

ASO LULU, 17 IUNI 2020

Na nofoia e le Fofoga Fetalai le Nofoa i le itula e 9:06 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga ma Galuega a le Fono Aoao Faitulafono.

Ia malo le soifua ua malo foi le lagi e mama i le paia o le Palemene i lenei taeao.

**TULAFONO TAU FAAOFI O LE FAATATAUINA O TUPE
FAAOPOOPO (NU.3) 2019/2020 & TULAFONO TAU FAAOFI O LE
FAATATAUINA O TUPE 2020/2021 – felafolafoaiga faaaauu i luga o
le faitauga faalua**

FOFOGA FETALAI: O le a faaaauu felafolafoaiga i le Tulafono Tau Faaofi, ma e tolopo Galuega a le Fono Aoao i le aso Fono ananafi o lo o saunoa le sui usufono mamalu mo le itumalo o Anoamaa i Sasae.

Ia, ou te tapa ma le faaaloalo lau Afioga i le sui usufono mamalu e te tulai mai e faaaauu lau saunoaga.

**Afioga ALAIASA MUAGUTUTIA MOEFAAUOUO
MALAGAITUTOGIAI SEPULONA MOANANU (Anoamaa Sasae):** E faatalofa atu i le pau o le taeao i le maleifua mai i faguga lelei o le paia o le Maota o Samoa. Ia, faafetai i le Atua ua le afe se faalavelave o lea ua tatou fesagai i magafetausoifua i lenei taeao.

I le aso ananafi sa matou seumatatoaga, talia lupe o maunu, o le taeao lenei, ia ua faiva ese foi Lopepe, o lea o le a o matou faatamamua ma seuifalemua. E le faigofie le malae i Tiafau, leaga o le malae e tausi e Lufilufi, Tuisamau ma Leulumoega, na tauasa mai le usoga ia Puleono i Salafai. Ona manatu lea, e le mama le taeao lenei leaga o le aso na faia e Ieova tatou te olioli ma fialia ai. O lea foi ua uma ona e momoli lapalapa o malo i le Atua, fai mai e le liliu o ananafi, o le aso, ae a lua, e tumau lava lona alofa, e tumau lona matautia, lea ua taitai mai ai le soifua o le atunuu i lenei taeao fou. O lele la ua gafoa ata e pei o le upu ia Paiatea ma Paialala, ua taatia le ata o le Tuifiti, ae taoto ataata o Taulelei i le taeao na liugalua. Ua ligoligo ai nei le tai o

Alo, ae noanoa le tai o Tigilau, ua liligo le fogatia ua pau le tuaau ma fuamalu. Aisea? Lele ua nofoia pou, pou o matuatata ma pou o lauga, ua atoa tino o le Palemene o Samoa, o lupe na faia mai le fuifui aua le Malo o Samoa.

O le taeao la lenei ma le aso lenei, leai o le aso e le i faafuaveta o le aso na atofa, aua le lauliliuina o le tofa ma le uta aua Samoa mo nei ma a taeao. Ona matou manatu lea, ou te manatua faiva o le tautai, o le agai i tai aua ni ai o le tai. Fai mai a tu ona vae i le alitai ona memu lea o lana faafetai, faafetai i le Atua foafoa ina ia faalaolao peau lagavale ma peauoso o le gataifale, ina ia aumai ni peau lagolelei aua le faamoemoe. A tepa i uta i atumauga, leai e manatua le tapuaiga i laoa ma maota. A tepa i tai, ona ia mautinoa lea, o ia lava le tautai na fili i le tai aua se tapuaiga. A maua ai o le faiva, leai e sasaa faaoti le utu a le faimea aua le tapuaiga. Samoa, ia tapuai maia, se i faaauau se faamoemoe o lenei itumalo. Lau Afioga i le Fofoga Fetalai, ua manino auofala i le aso ananafi i le auga o le faamoemoe o le sui usufono, lea ua matou folasia, Samoa, ia tatou mapu ma ia tatou malu i le Atua, e leai lava se isi mea e manuia ai, e ui ina itiiti, e ui ina faatauvaa lou atunuu, ae ese le faamanuiaina. Viia le Alii. O mea na te faia, o ana puipugamalu, o upu a na o le Tusi Paia, e leai se auupega e faia e mafai ona aafia ai le tagata ua i le Atua.

I lenei taeao, sa tau agai se matou tala i le aso ananafi i le tulaga o le faatoaga, ona e fesootai, na pau lava lea o le mea na faia e le Atua o le faatoaga, tuu loa i ai ma le tagata. E le i faia e le Atua ni taavale, e le i faia e le Atua ni telefoni, e le i faia e le Atua ni vaalele. E pei lava ona ou fai atu, na ona lulu lava o mea toulua uma lava mea na e tutu. Ae taatia mai lava mea e tataua ona fai. O le mea lea, o le taimi lenei, o le faaletonu o le tamaoaiga, matimati lou atunuu, matimati lou nuu, tua lava i le elelee, pe \$10 lava piliona e le toe faaopoopoina e le Atua le elelee ua na silafia e lava ma totoo mo le tagata, galueaiina. Lea foi e tau atagia mai lava e faapea o le a amata ona faaletonu le sapaia o isi mea ia e tua i ai Samoa. Samoa, e tua lava i nai mea ia, amuia oe e i ai le elelee e te tua i ai. Aua ne i faaseseina oe faapea o le a faatau e le Malo elelee, leai, o lou tofi na aumai e le Atua e faavavau lava o uu i ou aao. O le mea lea, matimati a tatou faatoaga e te tua i ai. Tatou te le i oo i le taimi e matua ogaoga ai le faaletonu lenei, leaga o lea ua logo le tala, ua aafia uma tamaoaiga o atunuu uma. E le iloa po o le isi 12 masina pau lea o le fautuaga, Sui o nuu, sui o le Malo, ia tautuana ma outou, e tua lava tatou i mea ia. O le ala foi lea na fai ai le Atua le faatoaga, leaga e silafia e le Atua mai le ao sinasina seia oo i le pepe, e faa-fa ona taumafa i le aso, e tataua lava ona lava le food security supply aua le tausiga o le soifua.

Aoga; faafetai o lea ua tali mai nisi manaoga o le Matagaluega o Aoga. Ae i ai lava nai isi mea ia sa faapea e sau, a o lea foi ua malamalama, ona o tuagia o le faaletonu ua i ai le tatou atunuu. A o lea ua matua faamalasia e le Matagaluega ina ia faaauau le mea lea o le fai o tatou aoga i luga o

fesootaiga televavave, aua e le uma ai lava lenei mea. [.....]. Ia o lea o le a taumafai atu le ofisa e alu atu lava tatou aoaoga aua le aotauina o tatou fanau. Ioe, o le mea foi lea e fesootai lava galuega a lo tatou Malo, e i ai tatou uaea ia e tai mai ina ia vave le... ia faafetai foi i le galulue faatasi o itutino o le Malo mo le manuia o tatou tagata.

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai...

FOFOGA FETALAI: Malie le sui usufono se i tuu atu lava le avanoa... O le a se mea o fia... Tulai mai le sui usufono mo Gagaifomauga Nu.3.

Susuga Hon Laauli Polataivao Leuatea: Ioe, e leai lava se agaga e faalavelave i le saunoaga matagofie a le tootoo o Tumua ia Lufilufi. Ia ae fai foi o lena a o lenei, o lea foi e faafofoga le tatou atunuu. Ia o le upu lea o le tu ifo foi se isi Saina faatupu se isi siama. Se ou te manatu i le tatou va i fafo o lea e faalogologo mai, o tatou paaga foi o lea tatou te tua i ai. A o le agaga lena o le tulai atu, o le a se finagalo i lau Afioga...

FOFOGA FETALAI: Malo faafetai. Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea sa ou manatu ou te vave tulai atu ae ua fetau ma le tu ae foi o le afioga i le sui usufono. O la e oo mai nei o la e tuuai e Amerika le Malo o Saina o latou lea e masalomia ona o Saina lea na amata mai ai le faamai, a o la e foi e tuuaia e Saina Amerika o latou lea e mafua. O le faapogai o lea tuuaiga, ona e i ai le article na tusi i le New York Times, na tusia e se tasi o latou sa nonofo i Iapani, le vaega foi lea a Amerika lea e nonofo i Iapani mo le puipuiga, fai mai le mau a lea tagata, o i ina lea na latou develop ai mea nei o siama for germ warfare, mo taua e faaoga ai mea o siama. Ia ai e i ai se latou autaaalo na o taaalo i le nuu tonu a lea na tulai mai ai le faamai lea, la e la e tusi e le Amerika lena o latou e mafua ai. E oo mai lava la i le taimi lenei, o la e faapea ai lava, tuuai e Amerika i o ona faapea o o la e na amata mai ai, a o la e foi e tuuai mai e Saina ia o i lea na amata atu ai, ona e i ai uiga na faa-Malo tetele nei, aemaise lava taimi foi o Siamani lea foi e tuuaia ai Iran e fai a latou suesuega e faatupu ai mea o siama, ona faaoga loa lea o siama na for warfare, o mea e masani ai Malo tetele. O lea la tatou te oo mai nei, e le iloa lava po o fea le mea o i ai le sao, na pau le mea o lea ua aafia uma le lalolagi. Na pau lava le tatou tatalo lea e i ai, afai o i ai se sao i i, e aoga foi mea e tutupu, aua po o ai lava e faapogai, pe a faapea lea e sao

ia ituaiga mau, ia latou silafia e aafia uma ai lava le lalolagi. E tele la le aoaoga lea e maua mai i i.

Lau Afioga i le Fofoga Fetalai, ae oo mai nei, o la e fai lava ma tuuai e le isi le isi, tuuai e le isi le isi, ma o le mea ua taunuu i ai le lalolagi i le taimi lenei, o lea ua oti tagata le lalolagi, ma o lea e oo mai lava i le taimi lenei, o lea e tausaili se vailaau e fofo ai. O mau ia na aumai, e 4 tausaga ina ua uma foi le flu, o lea foi e tuuai ia Sepania, ona o Sepania na amata mai ai, o le Spanish flu, lea na oo mai ia Samoa. O faamaumauga ia e i ai, e 100 miliona tagata na feoti ai i le flu lena e tau o le Spanish flu, e 100 miliona tagata na feoti ai. O Initia lava latou, pe a ma le 13 miliona tagata na maliliu ai. E le i taitai la oo le lalolagi i le tulaga lena, ae 4 lelei tausaga o tausaili se fualaau e fofo ai le flu. O lea la pei o se mea fua i le taimi lenei na o le flu lava aumai le fualaau tui inu uma. A o le taimi lena, na ona e maua lava i le flu, oti, maua i le flu oti, na tau ai le faamai o le faamai oti i lena taimi, 4 tausaga o tausaili se fofo.

O le mea la lea, tatou talosia ia, o lea ua tatou faalogo atu o la e ua amata test, faataitai fualaau ua maua ona ua galulue uma saienitisi o le lalolagi, ua galulue uma ina ia maua se fualaau. Ma e ua uma le mea lea o le galue lava o le saienitisi o le atunuu ia, ona o le taimi lenei, ua leai lava ma se tasi o toe malu i le mea lenei. E oo lava i le saienitisi ua feoti ai. O lona uiga, o le interest o tagata uma, sue se vailaau e fofo ai le faamai oti lenei.

Lau Afioga i le Fofoga Fetalai, o le taua lena o le tulai mai o le sui usufono e faamanatu mai mea ia, ina ia aua tatou te teletelevave i ia mea, aua tatou te le iloa po o fea o i ai le sao.

FOFOGA FETALAI: Malo. Ia, manaia le faasaoga ua tulai mai i le Palemia, ae malie le sui usufono sa ou tau fesoasoani atu foi i le saunoaga a le sui usufono, ae ua ou faapea ai le fagu lea o le olioli lea e mafua ai lau saunoaga. O lea la ua fai atu, e leai, ae mo le puipuiga o le va o tatou ma atunuu i fafo, ia aveese mai faamaumauga le saunoaga a le sui usufono.

Upu na faatonuina e le Fofoga Fetalai e aveese mai Faamaumauga o le saunoaga a le sui usufono mo Anoamaa Sasae – *[I toe alu alu foi se isi Saina faatupu ifo se isi siama aafia ai le lalolagi].*

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Ia, faafetai. Ia afai foi o se isi tagata po o se, aua o tagata ua amio faaletonuga tagata, e nonofo nonofo lava faatupu le mea. Ia o le mea lea ua tatou i ai lea ua tau nei o le patemi, pandemic, e le gata ua aafia ai le soifua maloloina, a ua matua oia lava le tamaoaiga o soo se atunuu i nei mea. Ae afai nei la ae fai suesuega

nei e fai nei a o ai se Malo na afua ai, e tatau la ona matua accountable tagata ia i mea nei, e tatau ona matua ave se tatou faasea e lagolago ai ni Malo e faatulai i sea Malo, ae faafetai mo...

FOFOGA FETALAI: Malo. Faafetai ua maua atu, ae see ese le sui usufono mai le tulaga lea.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Ia, o le tulaga la lea o le tatou soifua maloloina, faafetai i le Minisita mo le Soifua Maloloina mo lenei foi vaitau ma le feagai ai ma le tatou atunuu. Na pau lava o lea o lea ua o tatou mautinoa, e le i i ai se siama i totonu o Samoa i le taimi atoa lenei. Faafetai e le i oo mai, a o le a ala nei ona oo mai mea ia, ne i te i ua omai ma i latou o lea e malaga mai atunuu mamao. Na pau lea o se auala e ono oo mai ai ia i tatou lenei faamai, ae faafetai o lo o i ai auala o puipuiga e faapena ona tau togafitia ai ma vailiilia ai tulaga ia. E tele le ai o le...

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e taua le mea lea ua oo i ai le saunoaga a le sui usufono, e pei ona ou faasalalau maia i le 2 o aso, le Aso Gafua ma le Aso Lua sa faatalatalanoa ai i le Aso Lua ananafi, faatalatalanoa ai e le tatou Komiti nisi foi o talosaga mo le toe talatala atu o faigamalaga, o lea la ua maua ai, a ua uma ona faataoto le faaiuga a le tatou Malo mo le faatalanoaina ma le Malo o Niu Sila ma le Air New Zealand i le aumaia o tatou tagata ia na o i galuega faavaitaimi. O le mea ua ou tulai atu ai, ona ua silia ma le 3 vaiaso e le i toe gasegase se isi i Niu Sila i le mai lea o le Koviti-19. Ae peitai ane ina ua faagasolo le fonotaga a le Kapeneta ae toe lipoti mai loa le toe maua ai o le toalua i Niu Sila, o ni tagata mai Peretania, taunuu ane i Niu Sila ona o se tulaga faapea o se faalavelave po o se maliu o aiga e omai e asiase mai i ai, lea la na maua ai le toalua lea, ae na maua i le border. O lona uiga na maua lava i suesuega foi nei i le malae vaalele ma faapea na toe faafoi ai. O lona uiga la, i le faafogafoga mai a le atunuu a ua taoto le iuga a le Kapeneta, e leai se mea e popole ai, o lo o malu le puipuiga o tagata malaga atu i totonu o Niu Sila. Ma o le ala foi la lena o lea e avatu ai se faamatalaga ina ia toa pea le tai, o lo o lava le silasila a le tatou Komiti ma fesootaiga o lo o faatinoina pea i aso uma aso uma aso ma le World Health. E le gata i inei a o lo o faia foi fesootaiga ma Niu Sila i le tulaga o lo o i ai le faamai lea mai lea aso ma lea aso, o se galuega tele o lo o faatino e le aufaigaluega a le Malo i le soifua maloloina. E momoli ai foi le faamalo i le Tamaitai Minisita ma le Ofisa Sili o Pulega ma le latou Matagaluega o lo o galulue

ma le Komiti o lo o vaaia le puipuiga o le tatou atunuu, faapea foi la ma le tatala atu o le faitotoa mo le toe femalagaaiga i le va o tatou ma Tutuila ona o lo o malu foi le puipuiga a le Malo i le Afioga i le Kovana ma lana Kapeneta ma i latou uma o lo o nafa ma le puipuiga, ua tatau ai foi ona fai i ai se faaiuga ina ia tatala foi femalagaaiga i le va o atunuu e lua.

Lau Afioga i le Fofoga Fetalai, o le faasilasilaga lena ma le ava tele i le mamalu o le tatou Maota nei.

FOFOGA FETALAI: Malo faafetai. Ia, ua manino auofala i lea vaega i le puipuigamalu a le Malo o lo o faapea ona ave i ai le latou faamuamua. Tulai mai le sui usufono toe lua ou minute.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Ia, faafetai mo le saunoaga malamalama foi a le Palemia e uiga i le puipuiga lea. A ua tele la se fiafiaga foi o le tatou atunuu i tama ma tina ma e foi ua toe mafai ona autovaa mai ma toe faatasia ma aiga ua leva foi ona valavala. E le taugofie ia tatou nei mea, ae tatou te faia lava ona o le tatou vaai i o tatou uso a tagata o lo o fia maua foi faamanuiaga o lo o tatou i ai. O le mea lea e faafetai atu ai i le tofa foi na ae e faatino ai le tulaga lea.

Ia, i le aotelega lava ia o le Tala o le tatou Tupe, ia o se tala e pei ona malie i faaupuga, e tau autalu, tau aoao manogi aua ula mo le tatou atunuu i lenei vaitaimi. E le o faigofie le tamaoiga, aua a aafia fafo i le tamaoiga, e tele foi lona aafiaga mo tatou tagata. Ae faafetai mo lenei Tala o le Tupe, o lea foi ua vaai atu ua faamanuiaina nai o tatou tagata matutua. E i ai si ou uso o lo o vaaia le penisione a tagata matutua, le tofa i le Matua ia Iuli sa oo atu i le fonu a le matou nuu, faamalamalama loa e Iuli le tulaga o le siitia o le penisione. Na ona uma lava faapea Iuli, “ia, aumai se pati e viia ai le Alii.” Vaai i le patipati uma o toeaiina ma loomatutua i le manaia o le siitaga o le a fai nei, ia, ma e faafiafiaina ai foi latou aua le agai i luma, ma o le toatele foi o lenei Maota, o lea o le a agai uma lava i le 65 lea e \$160 ai le faamanuiaga o le tatou penisione.

Ae i le vaai lava ia faa-accountant i nei mea o Tala o Tupe, e inuina a lau iputi ma e matamata, leaga e taua le mea o le bottom line. E te matamata a foi lea i le pito i lalo, e vaai atu, ia ua pau le mea, tele le pau. So o se tagata faipisinisi foi, o lana ia lava lea fuainumera taua, e moni e le o le atoaga lea, ae taua. Aua a ou vaavaai nei la i le faagasologa lea o le a faagasolo ai le paketi, e mautinoa lava e uma le expenditure e faaoga uma lava e Matagaluega ia uma. A o luga la i tupe maua, o i ina la o le a fesiligia ai, ona o aafiaga ia e i ai, pe mafai ona aoina uma le fuafuaina o a tatou tupe maua. Tele le aafiaga pei ona i ai le lalolagi. Ia ou te manatu, o le bottom line la lea, e faatupulaia. O lea la ua tatou autalutalu mai ia ma maumaga o isi. E le

gata o le a e alu e autalu lou maumaga, ae o le a e tago fua i tupe a le bank e aumai e faatumu ai le mea lea.

Ia, o le fautuaga, tatou vaavaai, leaga o le amataga o le tatou Tala o le Tupe, o le saunoaga a le Minisita o Tupe, fua le ofu i le ie. O le mea lena na sau ai le tatou Tala o le Tupe muamua. Sau ai lava, fuafua ou manaoga i le mea ua e maua, a o lea ua oo mai i i, ua ese la le mea lea, e pei ua autalu fua le maumaga o le isi aiga talutalu ai le naunau i le mea lea. Ia na ona tuutuu atu faapena i lau Afioga i le Minisita o Tupe. Ia, pei ni faiga meaalofo. E i ai le tatou tupe lea e \$50 lea e tau tufa, se a le \$500 aua le faia se mea. E pei na o se mea faasee le mea lea, ae a e faatele i le 200,000 tagata, e \$10 miliona le mea e alu ai. O le mea lea, pei e sili le tuu o lea mea ia faaitiitia ai le bottom line lea ua ou vaai atu ua faaletonu. Ia, e le iloa po o le a le aoga o le \$50 ae a \$500 loa ua fiafia tagata e talia le mea lea.

Tofa Olo Fiti Afoa Vaai (Salega Sasae): Lau Afioga i le Fofoga Fetalai na o sina mea e fia faamalamalama. E pei ua ou vaai atu e le o silafia e Lufilufi le uiga o le \$50. O le \$50 i le ekisi lau Afioga i le sui usufono mamalu.

FOFOGA FETALAI: Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e le faia ni mea i ni ekisi, o lea e atiae le tatou Malo ma o lo o faagasolo pea polokalame. Ae pau lava le mea, a mafai e le Matagaluega ona tuuina atu le \$50 lea e faatino ai le faamoemoe lea, e toalua lava tagata e taofi aua ne i avea i ai se mea, aua ne i avea i le sui usufono mo Lufilufi ma le sui usufono mo Salega, ona e le taua la te le faataua ni mea.

Lau Afioga i le Fofoga Fetalai ina ia manino lelei le tatou Tala o le Tupe leaga e tele foi le sasi lea na lauga ai le isi ananafi i le tatou Tala o le Tupe. O le tatou Tala o le Tupe, i le aotelega ma le faapuupuuga ma le faamaninoga, i le faaaogaina ai o tatou lava tupe na maua na ao mai, lea e faatupe ai le faagaoioiga o le Malo, e aofia ai ma le totogi o aitalafu, tatou debts, lea na o le \$89 miliona. A o lea e fai mai isi, o le matua le mafai ona totogi. O lea e mafai lava ona totogi ia tatou lava tupe na aoao mai i totonu. E 3 lava vaega o lea e ave i ai le faamuamua, mo tupe e faagaoioi ai le Malo. O le a le tupe e tataua ona faavagavaga fai ai loa le atinae ona o le atinae lea e maua ai galuega a tagata ma tupu ai le tatou tamaoiga.

A tilotilo la i le itulau muamua, o le itulau lea muamua, e taua tele. A le malamalama le tagata i le itulau muamua e le malamalama i le budget atoa. O lea e taoto atu ai le faatulagaga o le Tala o le tupe. O le a le mea lea e taoto mai i i, i le itulau muamua. Atinae e \$107 miliona. E faapea ona faatupe? E faatupe mai i foai. E le o ni loan, o foai a atunuu e aumai. O le a la le mea e

popole ai? e a e taofi foai o lo o aumai.? E \$107 miliona lea e foai mai e tatou paaga, ma le \$11.4, e aumai ia tatou nonogatupe e mama le tului. E faatupe ai a tatou atinae e 2. O le mea lea na saina i le 3 ea tausaga talu ai, o lea lava e faaauau. O lona uiga, e le o ni nonogatupe fou le \$11 miliona lea, e na o le 2 lava atinae ia e sau ai le mea lea mai le AllBank, o le isi, e faatupe ai e faauma ai le malaevaalele la toetititi uma, ona uma lea. A o le isi e faatupe ai a tatou tane ia, ina ia lava le suauu e teu. E pau lava lona, o le uiga la o le tupe o le faasiliga, o tupe alu na i lo tupe maua. O lona uiga o tupe e sili atu na i lo tatou lava tupe. E aofia ai ia foai lea ma le \$11 miliona lea toetititi lava faamaea. O le uiga lona o le upu deficit. O tupe e i luga atu o tatou lava tupe na saili e \$838 miliona.

Lau Afioga i le Fofoga Fetalai, a le malamalama se isi i le itulau lea, e le malamalama i le Tala atoa o le Tupe. O le ala foi la lona na sau ai le lauga lea na sau ananafi ma le faauilavea lea na sau nei. E talanoa i tupe pau ae le malamalama. Se tupe pau la le foai e \$107 miliona? E le o se tupe pau. O le tupe e aumai faameaalofa, e faatino ai a tatou atinae. Aisea? O le talitonuina o le tatou Malo e Malo ia mai fafo i le faatinoina o galuega, ma le tulaga o lo o taumafai i ai. Ae faatino e ai? E faatino e Ofisa Sili o Pulega o Matagaluega ia e nonofo mai i i, ina ia latou malamalama i le mea lea e agaga i ai a outou afioga i sui usufono. O ai se isi o toe aisili, o Taitai o Samoa, ia e i totonu i i. Ae tuu lea mea o le tauamu, tauemu le malamalama.

Lau Afioga i le Fofoga Fetalai, o le uiga lona o lou talanoa atu, e le o se tupe pau, faapea ua pau ma alu atu ai pei se mea leaga. Se mea leaga le aumai o le \$107 miliona mai a tatou paaga? Ona o lea e vaai mai.... aumai fua. Ona o lea e vaavaai mai, o lea e taumafai tatou e faatino atinae, ona o lea foi e taumafai tatou e laga mai o tatou lava tagata le mea e igoa o le lafoga. O lea foi e taumafai tatou, fesoasoani tatou ia i tatou. E le o se mea lelei la, le totogi lafoga o isi, ae le totogi lafoga isi. Lau Afioga i le Fofoga Fetalai, ia manino i totonu o le Maota, le faigofie o le Tala o le Tupe, lea na faataoto mai e le Minisita o Tupe, ma le le malamalama i terminologies, o lea ua ou faamatalaina atu i se gagana faigofie.

FOFOGA FETALAI: Malo faafetai. O lea ua manino auofala, ua faapena ona...

Susuga Hon Laauli Polataivao Leuatea: Lau Afioga i le Fofoga Fetalai, sina avanoa lava se i avatu se manatu, leaga o lea ua taua le lauga a lenei sui usufono ananafi, e valea, e le malamalama.

FOFOGA FETALAI: Malie le sui usufono

Susuga Hon Laauli Polataivao Leuatea: Ioe lau Afioga, ua ou tulai atu...e ava tele i lau Afioga i le Fofoga Fetalai. O le a le uiga o le upu deficit? O le a le uiga? O le faaupuga lena, gau.

FOFOGA FETALAI: Malie le sui usufono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E valea, se i vaai i le umi o le taimi na ou faamatalaina atu. Se gau le \$107 miliona e aumai fua, grant? Lau Afioga i le Fofoga Fetalai, o le mea tonu lena o lea e taumafai atu. O oe tonu lena lea na fai i ai le lauga i le taeao nei. Ua leva ona e saofai i totonu o le Kapeneta e le malamalama.

FOFOGA FETALAI: Ua i ai le manatu ua...

Susuga Hon Laauli Polataivao Leuatea: Ua leva ona ou saofai ae fai toatasi e oe le tonu.

FOFOGA FETALAI: Malie le sui usufono, o le a le faia se faafinauga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le a ou faaalua i le polokalame iuga a le Kapeneta sa saofai ai lea i totonu. E le faia e au e fai e le Kapeneta. Ioe e fai e le Kapeneta. Se i vaai e tasi la lea tagata sa nofonono i totonu o le Kapeneta, ae le malamalama i lana galuega. E fai uma e le Kapeneta. Lau Afioga i le Fofoga Fetalai, mataga tele nei saunoaga e fai. E oo foi i iuga a le vaega lena, lea sa ou aumaia le faamalamalama, faitoatele e le vaega e pei o le fale lea na i gatai, e aumai le iuga a le vaega sa tatou auai, na fai toatele ai oe e le Vaega Faaupufai lena. E aumai le iuga ua tataua ona tuu i lalo ua dangerous le fale, ae musu e tuu i lalo. O lea foi la sa saofai mai i le Nofoa lena, ma sa'i mai i le Vaega lena, ua maua ula futifuti. Mea o le tagata e pei e tele le loto le lelei, ona nofo lava lea o ia ma aumai. Ana le aumaia upu ia, e le iloa e le Maota lena ma le anoano o le atunuu o faalogologo mai, le vaivai tele.

FOFOGA FETALAI: Malo faafetai. Faamalie atu i le sui mamalu.

Susuga Hon Laauli Polataivao Leuatea: O lou fainaalo lena ma e fia pule, o le mafuaaga lena ana ou le taofia le palota na fai e Tafua ia ou te le iloa le mea e oo ia te oe.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ia se i vaai i le le mafaufau, o lea e te saofai atu i i, ae fai mai o ia na tofia oe.

FOFOGA FETALAI: Malie le sui usufono...

Susuga Hon Laauli Polataivao Leuatea: Ua uma ona ou faalalolalo atu Toleafoa ma ou faatoese i lo ta va. Na ou faatoese... ao la ua silafia e le Party lou loto ua atoa mo lau Afioga. Na ou faatoese atu ananafi, magalo sou sese. O la e silafia e le Atua le mea na tupu....

FOFOGA FETALAI: Ou te fesoasoani atu, masalo o lena foi e te silafia na e tausia foi le tatou Palemene. E faauilavea le Fofoga Fetalai i le sui usufono o saunoa, e faapena ona tuu mai le avanoa. Aua e malu le Nofoa ia o a outou afioga. E i ai le manatu o se faamalamalamaga o se mataupu, o le faamalamalamaga mulimuli a le Malo o le faamalamalamaga lena tatou te tuu i ai. Aua se i tulai mai foi se isi faigamalo ona faapena lea, o ai e saunoa o lena faigamalo, o ia lena o le faamalamalamaga mulimuli lena. E manatua foi e le Palemene, e ala ona alolofa mai atunuu i fafo ma aumai a latou foai, o le vaai mai foi o atunuu i fafo, o lea e maopopo ma faaoga tataua a tatou seleni ma le latou foi fesoasoani mai. Ma e silasila mai foi, e faamuamua e tatou ona atinae lava tatou e tatou. E pei lava foi o le finagalo o le Atua, e fesoasoani mai le Atua i le tagata pe afai o le tagata o la e muamua ona fesoasoani lava ia ia te ia. E faapena le soifuaga lea tatou te i ai. O ai a fesoasoani i le isi la e eva eva ona sau lea aisi mai. E leai, e faapena le lagona, o lou lava lea finagalo o lau faamalamalamaga lena o lou lava lea finagalo i le mataupu. Ae o lea ua tulai mai le Taitai o le Malo e final, ua final le faamalamalamaga. O le faamalamalamaga mulimuli lea. O le mea la lea, ou te faamalulu atu, aua tatou te toe foi i tua. Ma e i ai le manatu, faaiu mai le saunoa a lau Afioga le sui usufono mo Anoamaa.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Faafetai, o le mea lea na e tofia loa au ananafi, ou faapea loa, ia o le a vevesi nei foi le aualii lea i le faamoemoe o lenei taeao. Ae ia toa le tai, se tago i le too ae tepa i le ata. Silasila i le paia ma le mamalu o le tatou Maota. O se tuualalo lea a Lufilufi. Ae o lenei taeao, o lea...

FOFOGA FETALAI: Malie le sui usufono mo Lufilufi....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e le o se vevesi lea mea. E ala ona ou fai atu e le o se vevesi. A na

soifua mai i latou nei i le taimi na ou faatoa ou oo mai ai i inei le Palemene. Oka oka oka, tou te le i feagai ma upu sa fai i i. E matua maoae upu, e matua valaau mai lava le isi agai i le Fofoga Fetalai, o upu maoae. Ae ou te faafetai i lenei taimi, e matua toa lava le Maota i le taimi lenei. Ae le mafai ona ou tuua se mea e tatau ona fia faasao. Leaga o le Tala o le Tupe atoa lenei, o lea e agai i ai le tatou Fonotaga. O lea e faafoe ai le tatou atunuu i le isi 12 masina. O le ala lena e le tuumamaina ai e le Kapeneta, ia ni lafoga e ono aveseseina ai le taumafaiga o lo o taumafai atu ai le Kapeneta mo le atinaeina o le tatou atunuu, aemaise taimi nei, taimi faigata nei. O lea e faafeagai tatou ma faamai, ma e ono oo lava i atunuu o lea e aumai ai fesoasoani, e ono le toe tutusa. Lau Afioga i le Fofoga Fetalai, o le ala lena e le mafai ai ona matou nofonofo ae tatau lava ona faasaosao mea ia. Leaga na amata ananafi i le mataupu lea. A ou le vave oo la i ai i le tulaga lea, a le tagofia vave e le Kapeneta e ono sosolo, le le malamalama lea, ona faaumiumi ai lea o le tatou Fonotaga.

FOFOGA FETALAI: Malo faafetai. Tulai mai le Minisita o Galuega.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Faafetai mo le avanoa lau Afioga. O lea ou te toe fia talanoa i le deficit lea, leaga sa ou Minisita foi o tupe i tausaga ua leva. Ae o lou malamalama i le mea lea o le deficit. E le o se gau, it's not a loss, o le tupe pau lea pe a aumai le paketi, mai tupe e fuafuaina e maua, mai tupe faaaoga. A tele la tupe faaaoga, a le lava tatou ordinary revenues lea e aumai i fuafuaga a le Matagaluega lea e aoina tupe. O le mea lena e tau o le deficit. O tupe lea e aumai e faaatoa ai le deficit lea, mo mea o foai, mo nonogatupe mama. Atonu la e sao le saunoaga a le Afioga i le Palemia, a le malamalama la tatou i le mea lea... ou te manatua foi sa finau ia le Afioga ia Saleimoa, faasamoa le deficit o le tefisito. Ae le o se gau, a le atoa tupe ia e aoina mai e le Malo mai ordinary revenues, faaopoopo ai la ia tupe ia e alu i expenditures, e le atoa. O le mea la lena o le deficit ae le o se gau. Ae faatupe mai la deficit lea mai tupe ia e fesoasoani mai fafo, ma nonogatupe mama, ona atoa lea o le tupe e faatupe ai le tatou paketi. O se faapupulaga lena o le tatou mataupu, aua a le malamalama, o le mea lena na saunoa i ai le Palemia, e le malamalama atoa le Tala o le tupe. Faafetai.

FOFOGA FETALAI: Malo faafetai.

Afioga Hon Afamasaga Lepuia Rico Tupai: Lau Afioga i le Fofoga Fetalai, e na o ona faaopoopo i le tulaga lea. E i ai le numera e mafai ona tatou tilotilo i ai, e faatoafilemu ma faanofo filemu ai tatou ma le atunuu i le mea lea. O le numera o le tatou aitalafu i le va ma le tamaoiga, debts, so GDP ratio. O tatou, o lea na o le 48%, o le taimi lenei i le lalolagi, deficit

uma lava paketi o le lalolagi atoa i le taimi lenei o le faamai. O isi deficit i totonu o le pasefika, e 7%. O tatou, o lea ua outou iloa le numera lea ua i ai. Ae se i faamanino lava le mea lea, leaga e le o le taimi muamua lea ua fofola ai i luma o le Palemene. Lau Afioga, o totonu o le Kapeneta e le fai toatasi e le Palemia. O lea e faafofoga le Kapeneta, e finau mataupu a le Kapeneta i totonu o le Kapeneta faatoa oo mai lea i totonu o le Palemene, e le faia toatasi e le Palemia tonu. Lau Afioga ma le paia o le Maota nei a o faafofoga foi le atunuu. O le tonu fai faatasi a le Kapeneta e matua finau le mataupu i luga o le laulau, e le fai toatasi e le Palemia ia tonu. E toe faamanino le tulaga lea, leaga e le o le taimi muamua lea ua fofola ai i luma o le Palemene lenei faafetai.

FOFOGA FETALAI: Ua manino, ae malie le sui usufono mo Gagaemauga Nu 3...o lea o le a ou faamalamalama atua.

Susuga Hon Laauli Polataivao Leuatea: Lau Afioga i le Fofoga Fetalai, ua ou ava atu. Afai e saunoa le Taitai o le Malo, ua lava lea mo au ma le Minisita. Ia ae o le saunoa o le isi tagata faatoa sau, o le agaga lena, I'm not talking na o le Kapeneta, overall, mea uma.

FOFOGA FETALAI: Malie le sui usufono, leaga o lea o le a e toe toso i tua le tatou, ioe, ae manaia le onosai mai, se i tau fai atu foi se faamatalaga a le Nofoa latou. Sa tatou saofafai uma foi i totonu o le Kapeneta e le i faapena ona fai. E soalaupule le tulaga o le Kapeneta ia ona autasi lea i se faaiuga o le faaiuga lena e fai. A o le tulaga e pei ona i ai le, ia o lea ua saunoa le Palemia, e faamalamalama le tulaga lea o le tupe pau, ma le tupe gau. E i ai lona eseese o mea na, sa finau ai foi i le fatia ua sola ia Asiata ma Saleimoa a o tulai mai foi lena taitai. Ae manaia le saunoaga a le sui usufono mo Anoamaa, ona o ia foi o le isi suetusi. Ae o la e taoto lava i le tulaga, o le eseese lena, a faafelea ona le pau a tatou tupe ona o lea e faamalie le atunuu, o le fesoasoani i le atunuu. O fea e aumai ai tupe e sii ai penisione, o fea aumai ai tupe e fai uma ai.... ioe... a o la e fai atinae, o la e tulei lava atinae. E le o nofonofa ai atinae, o la e fai. A o la foi e fai le fesoasoani a le Malo i tagata taitoatasi, pisinisi ma e tusa ai o le faapau o tului, pe suspend i le 3 masina pe fia. Ina ia fuafua i le leai o ni turisi ma le tulaga pagatia o i ai Samoa ma le lalolagi. Amuia Samoa na o ni nai miliona, se i faafofoga atu ia Amerika ua faapena. Ua fia selau afe tagata ua leai ni galuega. O le mea lea, se i onosai mai, fai fuafua leaga e le taligofie le Malo, e faapena. O le tagata o la e tigaina. A aumai loa se mea faapena, pe e te tigaina ae faitio mai le tagata o la e nofonofa, aa, leaga tatou te le Atua i taimi uma. O lea e faamalulu atu ai i le sui mamalu. Ae faaiu mai le saunoaga ua uma lou taimi, lau susuga Lufilufi.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Lau Afioga i le Fofoga Fetalai, e ala foi ona ou talanoa faapea, ia manino le Palemene ma Samoa, I'm free. Ioe, e le faapea e saisaitia au e fai sau tala i totonu o le Maota leni e fai sau tala i mea ou te manao i ai. E leai se isi e taofia au. E faaali lava lou manatu sao, leaga ou te malamalama tele i le mea lea. A ou toe talanoa atu foi la i mea ia e tau o short term loan ma o le deficit a le mea. O lo o faapena, ae e ala ona fai atu lau tala, e leai se mea o saisaitia ai sui usufono o le Palemene e fai a latou saunoaga i totonu o le Palemene. O lau aiatatau lena na aumai ai oe e lou itumalo. Ona faapea lea o se matou tala, alofa ifo i le auala galuega o Lufilufi, ioe, se ua leva ona tatalo atu, alofagia ua lava le la mea lea na tau mai o le afa mulimuli.

FOFOGA FETALAI: O a la mea a fai ai le auala o Lufilufi...

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Pule lava outou pe toe fai foi se isi deficit e fai ai le faamoemoe. Alofa ifo ou te le iloa i le Afioga i le Minisita o le Soifua Maloloina pe na logo atu, sa sau le savali a le matou nuu i Lufilufi i le falemai, se i alofa ifo i se fale o le fomai e tumai i ina, aua le tautuaina o si o matou itumalo. E leai nisi mea se tele, pau lava o lea, e pei ona matou tautaualemau, ia toa le tai. Se e iloa lava le ia o le tai loloto ma le ia o le tai papau i ana aga. A o le vaitaimi leni tatou fale i le Atua, e leai se mea e maua ai le filemu, leaga o Iesu o Ia o le Alii o le filemu, na te aumaia i lou loto le filemu. Ia maua le filemu o le Alii. Fai mea fiafia, se tatou te box on lava i i, tatou o atu i fafo tatou talie ai, ona uma lea ma manaia le tatou. O le sui usufono lea mo Salega na tutua foi le mea lea. Leaga o le \$50 sauoo e mai lava i le 0 e tau i le 100. O lona uiga o le 0 i le 20 e le palota. A o lea ua fai lava le saunoaga fai mai o mea o le palota. O le mea foi lea e sao ai foi le Palemia, a le malamalama aua le saunoa i mea e le malamalama i ai.

Tofa Olo Fiti Afoa Vaai: Lau Afioga i le Fofoga Fetalai, o le mea e fia faasao. E le o manino mai le \$50, e na ona fai mai o le \$50 e avatu. E leai ni tausaga faapitoa o i ai. O le matuai sese lava la o le mea lea e saunoa i ai.

FOFOGA FETALAI: Ua ou manatu, aua le aumaia, malie le sui usufono. Aua le aumaia au tufagatupe i lou itumalo i au palota, e fai ai mea a le Malo, o lea e fai i le agaga mama ma le agaga sao.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e pau lava lea o si mea e fia faamalamalama. O lea ou te malamalama

e malamalama lelei le sui usufono mo Lufilufi. Ae o le tulaga ua ou faaaogaina ai lana saunoaga e faamalamalama ai ma isi mea ia na aumai ananafi. Ina ia fesoasoani foi ia i latou o lo o mulimuli mai, mulimuli mai ae fia talanoa i le vaega lea. A o totonu o le tatou Maota e le taofia le saolotoga. Ae ou te faafetai i le sui usufono mo Lufilufi ua toe agai i le vaega lea, ua maua ai ma le avanoa, ou te tulai atu ai, e toe faamalamalama mea ia sa ou le fia tu ai i le aso ananafi. Ae sa ou faalogologo pe toe i ai nisi e toe o mai ai, ae o lea la ua toe sau ai Lufilufi, ona ou faapea lea, o le a ou fesoasoani i le pitolaau a Lufilufi, e faamalamalama atili. O le faamalamalama la lea ua ou faalogologo atu, e pei ua i ai se taofi, e le o saoloto sui i totonu. E leai o le saolotoga lava ia, o le saolotoga lena o tatou. Ae pau lava le mea, aua ne i sese, aua e sese loa, ona tuuaia ai lea o le Kapeneta. Aua e le mafai ona taofiofia le Kapeneta i le tutulai atu e faamalamalama ia se mataupu. O le fesoasoani atu lena, a o le tulaga ia, e saoloto lava i tatou i totonu o le Maota nei.

FOFOGA FETALAI: Ua uma lou taimi, faauma mai loa, faatofa loa i lou itumalo Lufilufi. Ua maea lou taimi.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Faafetai i saunoaga, o lea ua tetele lava i pesega ae matua lava i le oo le faamoemoe o lenei taeao. Le tapuaiga a si ou itumalo, o le matua malosi lava o le sui usufono i le mea lea ua i ai. Faafetai i la outou tatalo, faafetai i la outou tapuaiga mau. Le paia foi aua le Toaono ma le saofaiga, Tupai ma Seutatia ma ou fuaiala, faamanuia le Atua i le tapuaiga, faafetai tatalo. Le tapuaiga foi i aiga, ma Aloalii ma la Ulumatua ma le tofa Sololeaai, faafetai tele i lo outou lagolago ua manuia ai faiva. O lea o le a faaiuiu lava, e leai lava se mea o pona ai la tatou malaga. Ae pei o le a tatou vaavaai pea i lenei faamai, o lo o tatalo atu lava le sui usufono ma faapea ia nonomanu i le Atua ina ia puipuia lo tatou itumalo aemaise foi o Samoa atoa.

Ia maua se finagalo i lau Afioga i le Fofoga Fetalai, maua foi se finagalo i le Afioga i le Palemia, faamalulu atu foi i sa outou faafofoga i se faamatalaga ua le tau tamalii a le sui usufono. E potu lava le tagata ma le tautai ae le atoa ia o lona faiva. Faamagalo le auuuna pe a ua i ai foi se mea ua le tau tamalii i la outou faafofogaaga. Le tapuaiga a lenei Maota, Ofisa Sili o Pulega o Matagaluega, malo galulue, ia o le tatalo ia tului e le Atua lo outou soifua e tautua ai le mamalu lea, aua se ai mo Samoa ma le tapuaiga. Le au faitatalo a le Atua, faafulu mai lagi la outou tofa. Soifua ma ia manuia Samoa, ae ola le sui usufono mo Lufilufi faafetai.

FOFOGA FETALAI: Malo faafetai. Malo saunoa. Ua tulai mai le sui usufono mo Salega i Sasae e saunoa e tusa ai ma le Tala o le tupe. Sauni ia lau Afioga i le sui mamalu o Salega i Sasae.

Tofa OLO FITI AFOA VAAI: Faafetai i lau Afioga mo le avanoa. Ua ou manatu o lea ua maea ona faaauseu le manu o le tuasivi. Ma ua taoto foi i liu le atumua a le tautai i le tatou faafetai na e siitia i le taeao. O lea ua mafua ai ona laolao le vasa i asuisui, ua tatou futifuti manuula ai foi i lenei taeao fou, le taeao matagofie. Momoli mai lo outou soifua ma so matou ola, aua le faamoemoe o le Palemene i lenei aso. Ia, e ui lava ina feagai tatou ma le taili mai le lai i Sili ma tatou fetaii ma peau lagovaa. Ae ua manumalo le alofa tunoa o le Atua ia i tatou aemaise o le tatou atunuu. O le viiga ma le faafetai o le faamanu e foi lava i lo tatou Matai Sili. O paia foi ma mamalu o Samoa i ona itu taulagi ma ona vaega eseese e talitonu lava le taofi o lenei itumalo, e le mafai e se matou upu ona matou fuli se mauga. Aua o tuasivi ua taoto e toto i ai le toaga, e toa i ai ao o le lagi. Ona manatu lea lau Afioga i le Fofoga Fetalai, o le a nuunuu atu ia faatini o tausala i faiva totofi, ma faiva alofiaao o Tumua ma Pule e tausi vaatele aua mamalu o Samoa. Ne i te i foi ua uma lou taimi, ae sili loa lou alu sao i le Tala o le tupe. O lea ou te toe talanoa i ni tefisite po o a uma isi mau mea po o fuainumera, malamalama lena vaega.

E avatu lava lau faamalo i lau Afioga i le Minisita o Tupe faapea foi le Ofisa Sili o Pulega ma le mamalu o le Matagaluega. E talitonu lava le taofi sa outou timuia ma laina i vasa, i outou faiva tausaili, ma outou faiva aisi, aua le faamoemoe lenei. o le upu moni lava e le faigofie la outou galuega ae faamalo lava faafetai. E ui i lea o lea ua suati mai la outou ola fagota o le a tatou faasoa. Aua o le taimi lenei, o taimi foi ua faatuofe ai tautai o gataifale, aua ua lupepe le taumanuula. E tapisa ai foi le toatele aemaise lava o le tatou Palemene. O le taimi foi lenei, e aliali ai foi le tofa aiu o le isi sui usufono, ma le fai mea ita. Ae o lo o manino le upu a le tusi lau Afioga i le fofoga Fetalai, “o le ita o le mailei a le alii o le lalolagi” o la Paulo, o le faauilavea soo ua fusifusia o ia e le tiapolo. Lau Afioga i le Fofoga Fetalai, tau lava ina faaleo ai se lagona o lenei itumalo.

FOFOGA FETALAI: Se i tulai mai le faauilavea a le sui usufono mo Falealili.

Afioga Fuimaono Teo Samuelu Teo (Falealili Sasae): Ona o ita nei e faitau i le Tusi Paia, ae fia maua po o fea tonu o le saunoaga a Paulo e i ai le mea lea o le faauilavea soo faamolemole.

FOFOGA FETALAI: Se i tulai mai le sui usufono.

Tofa OLO FITI AFOA VAAI: Ua vaai atu ua tau faaletonu, o Saulo e le o Paulo lea ou te fai atu ai. Lau Afioga i le Fofoga Fetalai, faafetai mo le avanoa, se i faaleo se faafetai a lenei itumalo, po o ni o matou mitamitaga foi a o tapuai mai le afioga i le Matautia ma ona Alo, aua o le Tuiatua o le Tuiaana, ia o le Tuisamoa le tamaloa. E faapena foi ona tui mai le mulipapaga e le paia o le aiga Samoeleoi, o le iga na mua i malae. O le faaautama gafa o aiga o Samoa. E faapea foi i le tapuaiga a le aiga sa Lilomaiava ia ma le Alalamaota, Maopu ma Tapaau taulagi o lenei itumalo. O paia na ma mamalu e tausii ma puipui e Olo lea e tulai atu. Olomaulugaeleaeaeesefili o le faaumiina lena o lou igoa ia faapea foi le fetalai ia Sela le mamalu i le Alataua. Ou te vaai atu pei e te le o maua lelei le faaumiina o lou igoa Olomaulugaeleaeaeesefili lau Afioga i le Fofoga Fetalai pe a faapea o lena e te tau...

Lau Afioga i le Fofoga Fetalai, o le agaga faafetai a lenei itumalo e le alo pitotasia lo matou vaa. Aisea? Aua e matautia suiga ua tatou i ai nei. Suiga na faasolosolo mai. Pe a fua atu i le amataga na tutoatasi mai ai lo tatou atunuu ma lo matou Malo e tau mai i le 2020. Ia e moni ai upu, o le tai ma lona taaga, o le mafua ma lona pa. O le aso foi ma le mea e tupu ai.

A tatou toe tomanatu nei i fatia ua sola, i le fitaituga ma le afuliligi o nai o tatou tuua, na asaina le gasu o le taeao, e maofa le loto. E maeu foi le lototetele o nei taitai. O le ala lena e avatu ai le matou faafetai, e ui ina lalago mai i tiasa, nisi o taitai sa amata mea. Ae matautia le felanulanui ma le matagofie o le latou tofa saili. Ia e toalaiti nai toeaia sa maua avanoa i le aoaoina i lena vaitau ae o le maeu o le tofa, le tofamamao ma le utaga loloto.

Lau Afioga i le Fofoga Fetalai, e mafua foi la ona tau tepa i tua ia se manatu o lenei itumalo, ona o lou fia faitatala foi lea i le eseesega o le tofa i lena vaitaimi ma le atamai faa-aoaoga **academic** i le taimi lenei. Sa ou tausaili ai pe faapei foi ni o latou metotia na amata ma faufau mai ai ia le atinaeina o lo tatou atunuu.

Lau Afioga i le Fofoga Fetalai na i ai le aso na ou faaaogaina ai ia le tatou potu tusi. Sa ou agai lava ma ou matamata mai ma ou faitau mai lava i le 1962 i felafolafoaiga ia ma Tala foi o Tupe i lena vaitau. E malie lava i lau faitau lau Afioga Fofoga Fetalai, ona o aga ma fesuiaiga o latou faasoa i lea tausaga ma lea tausaga e pei lava ona ou fai atu. E amata mai lava i le 1962 lau faitau e tau mai lava i le 2020.

O faasoa sa faia ma le toa, fai mai ma le totoa i nai seleni sa mafai ona latou maua mai i lena vaitau maua mai i le popo, o le koko, o pusafai, e aunoa ma so latou faamoemoe i ni nonogatupe ma ni fesoasoani. O le mea lena e ofo ai. A nono foi tupe a toeaia i na aso, e nono mai i le Uesitete, e nono mai i le Copra Board. E ese le matautia.

O le mea foi la lea e auai lou manatu i le saunoaga a Lufilufi lea na saunoa nei, taimi sa tua 100% i eleele ma faatoaga. Sa leai se popole i le tulaga e pei o le mea lea ua o tatou oo i ai, o se mea e ono oia ai le tamaoaiga o

Samoa. Aua e pau le tulaga i na vaiata pe a oso ni afa. Ae a oso ni afa ua touulu fai se i tulou le Maota, ia ae ola lava le talo. E aoga foi ia latou ia le afa e toulu ai popo, ia ona fai lea i ai o le latou fuafuaga i lene mea.

Lau Afioga i le Fofoga Fetalai mai le 1962 e oo mai i le 1984, ao le i pale mai ia le HRPP e taitaiina ia lo tatou Malo, sa fai ai le tau faasoaso mai i le 1969 e oo i le.... tau faasoaso mai le \$4 miliona, \$6 miliona. E oo mai lava i le 1979 i le 1980, ua oo mai i le \$14 miliona, tupe sa tau faasoaso. Ae o le taimi lene, e 115,000 120,000 le aofaiga o tagata o lo tatou atunuu. E le i tele ni vaegatupe foi lea po o ni alagatupe sa mafai ai ona taumafai ia lava le latou faasoaso. E leai foi ni lafoga i luga o taumafa sa tatou aai ai. Ia o le taimi lene e le i tologiina ni vai, e le i i ai ni service fees a Matagaluga ma Faalapotopotoga a le Malo. E tele foi aseta i lene taimi.

Ia o lene foi taimi, i lalo o le tatou Kamupani Vaalele, lea sa feoai ai le Losi ma le Pili, se e matautia. E le i i ai e moi lava na i ai nai vaega sa faaletonu, ae na matua flow lelei le alu. Ia e oo foi la ia tatou aitalafu na ou vaai ai, e le i atoa se \$20 miliona i lene taimi. Ma e le i i ai foi ia ni a tatou faletetele i lene taimi.

Ae ina ua tulai mai ia le HRPP, tele le suiga. Faafetai, faafetai i le Afioga i le Taitai o le Malo ma le Vaega Faaupufai, ua o tatou faasoaso nei ia le \$800 ma ona tupu miliona. Ae o le tulai mai o le HRPP i le 1985, faasoaso le \$75 miliona. O i ina foi la, na puna ai loa i luga ma aitalafu. Ia e manaia foi ia le tatou taulaga ua tatou matamata i ai e manaia i le tatou vaai. Ia ae o le eseese mai i le taimi lenei, ia o lea ua i ai ia le tatou GST. Lelei foi le fuafuaga sa fai ai, sa fua i ai. Ia e faapena foi ia le.. i lene taimi ia e pei ua faatau atu ai ma aseta. E fai la o le alu i luga o tatou aitalafu, a ua alu atu ai ma aseta.

E i ai ia le tatou Samoa Tel, o le tatou Telecommunication lene sa i ai le Telecom. O le Bank o Samoa, o le Vailima, o le suauu popo, o le Kamupani lene o le Suauu Popo. E pei o eseese na lau Afioga i le Fofoga Fetalai na ala ai ona mafua ona ou talanoa atu i le vaega lea. I lau la faatusatusa atu i ai, o le taimi lene i tua atu ae e le i tulai mai ia le HRPP, sa taua ai e nisi atunuu o le atunuu matitiva. Ae i lau vaai ma lau faatusa i ai, na matitiva faafesagai, leai se popole, mativa ma le loto fiafia. Ae a nei?

Lau Afioga i le Fofoga Fetalai, ua tatou matitiva ma loimata, i le tulaga lea ua i ai. Ia aua na i ai foi ia saunoaga na fai i totonu o le Maota lenei, i le 1994, sa faapea 'Samoa tatou ositaulaga', ositaulaga se i atinae le atunuu. E i ai se taimi tauai la outou galuga.

Lau Afioga i le Fofoga Fetalai o lea ua 38 tausaga, o lea lava tatou te ositaulaga. O le mea lea ua ou tau vaai atu ai, se e pei lava e sese le Atua lea e fai ai le mea. Po ua tatou ositaulaga ea ia Paala e le i tali mai. O le ala lene o lou fai atu, i le tulaga lea.

I le aotelega la o sau faamatalaga lau Afioga i le Fofoga Fetalai, i le tulai mai o le faamai lenei, lea ua tatou tapisa nei, ua oia ia le tamaoiga ona o le

faamoemoe, faamoemoe autu o le Vaega Faaupufai a le HRPP i le Turisi, ia ma tupe lafo mai, lea ua oia i le taimi lenei. Ae e i ai lou manatu e sili ai ona tatou toe foi eleele. Po o le a lava le tulaga e i ai, e tatou te mauu ma stable lelei ia le tamaoiga pe a o tatou faaoga o tatou eleele.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai...

FOFOGA FETALAI: Malie le sui usufono se i tulai mai le sui usufono o Faleata...

Tofa Lealailepule Rimoni Aiafi: O lea e tau nofonofo ma matau le saunoaga a le sui usufono mamalu. A uma ona faafetai mai i le Malo ma faaviiivii atinae, ona toe fai mai lea e tele aitalafu ma... Ou te le o malamalama la i ai, aua o atinae ma le tulaga ua i ai le Malo, o lea e tali mai le Atua. O lea e tali mai le Atua, ae o lea ua toe nofo ma toe feau, e ese le tagata lea e tapuai ai le Atua.

O lea la ou te le o malamalama, po o fea tonu lea e agai ai le saunoaga a le sui usufono. O lea foi na tatou amata, le Palemene lenei, na amata i le Palemene tuai. O lea ua faaii, i le Palemene fou ma le matagofie. E tele ma anoanoai atinae se i ou lauga na ou lauga lea i ai. O le mea lea e fia fesili atu ai i le sui usufono mamalu, ona ua pei ua fesiligia le Atua, fesiligia le Atua. Ae ou te ofo, ma le faaloalo lava.

Tofa OLO FITI AFOA VAAI: Lau Afioga i le Fofoga Fetalai, o le osigataulaga ua le talia. A la e manino upu o le tusi. E talia e le Atua ia le taulaga e osi atu, i le Atua soifua. Ae e le i talia e Paala ia isi osigataulaga sa fai atu.

O le Afioga foi i le Sui Minisita, se ou te ofo. O lea ua atoa nei le 4 tausaga o i ai i le HRPP, ae e le i faalogo lava i le... o le aitalafu e atinae ai le atunuu. Ia o le uiga lea e fai atu, e le leaga se aitalafu.

FOFOGA FETALAI: Ia, talu ai ona o lo o faafofoga tapuai le atunuu, ia o lea foi ua tulai ia le sui usufono o Faleata e faaleo le tulaga o le faasaoga o le itu lea. Ia e i ai le manatu ou te fesoasoani atu i le sui usufono mamalu. Ia e leai o tatou o taitai, o la e lavea i o tatou Tulafono foi nei o le Tautoga o le Loto Faamaoni. Ioe ia o tatou talanoa, i upu o le tatou tautoga. Leaga e pei e foliga o la e faafofoga tapuai mai le atunuu i o latou ave sese ia lou finagalo lea e... leaga o lea ua ou maua atu, e le tali le Atua ia tatou leaga o lea e tatou te tapuai ia Paala. Ioe ou te matua ofo i le sui usufono mamalu, ou te ofo au.

Ua ou manatu ou te faatonuina, see ese mai le tulaga lea, leaga o lea e tali le Atua ia i tatou. A foi o le tali a le Atua lea e tatou te le o lavevea i le

faamai, ese mai i le sosia ma le tamaoaiga, lea e tatou te aai ma feinu ai e ala i faamanuiaga eseese lea e tatou te maua. Ae malie le sui usufono, see ese i le itu lea.

Tofa OLO FITI AFOA VAAI: Lelei faafetai i lau Afioga i le Fofoga Fetalai, ne i tai seseina se finagalo, ae sa ou faatusa ia le taulaga i le Atua i le taulaga e osi ia Paala....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Malie le sui usufono se i saunoa mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai a silasila mai e matua usi lava le faafogafoga a le Itu lenei, aemaise lau Kapeneta ma sui usufono o le HRPP. O lea e fia faalogologo i upu a le tagata e na te le faafetaia le Atua i nei mea lelei e tatou te vaavaai i ai. O le tagata e leaga lava mea uma i lana vaai. Manaia ia o le pese a le Ekalesia, aufaipese a le Peresetene a le Ekalesia Metotisi lea sa usu mai i le aso na faamanatu ai le tatou Tutoatasi. O pese e vivii ai i le Atua, i le mananaia o nei mea e vaavaai ai Samoa, o mea na Ia faia, aua foi o lea e tatou te faalogoina pea faalogoina pea le Salamo. E leai se atinae e lelei pe a le faia e le Atua. O le matagofie o lenei Maota, matagofie o lenei Maota, o mea e fai e le Atua. E faatupu e le Atua manatu i le Malo e faapena foi Taitai o le Malo, Kapeneta ma le Vaega uma Faaupufai. E aumai Tulafono i totonu ma pasi ai lea atinae ma lea atinae, i le alofa tunoa o le Atua ua na faamanaia ma faaauleiina ai le atunuu lenei o Samoa e faavae ia te Ia. Aemaise le fulisia o le Maota lenei, e aumai i totonu upu e Faavae i le Atua Samoa sa Preamble, e le o se vaega o le Faavae, tuu totonu o le Faavae, i le Nofoaiga lenei.

O le atunuu e faamanuiaina, ae o lea e mele e ia lea. E le mafai le mafai, ona malamalama i ai se tagata ua tiapoloa le mafaufau. O le ala lena o lea e matou te nofonofo ai ma usi le faafogafoga se i sau pea ia, sau pea ia, ae se i faafogafoga mai Samoa, silasila i ituaiga sui usufono na aumai e Salega i totonu. Silasila ituaiga sui usufono na aumai e Salega i totonu. E na o mea leaga, mea leaga mea leaga lana vaai. Matagofie o vaa e feoai ai ma le matagofie o alatetele o lea e feoai ai.

Lau Afioga i le Fofoga Fetalai, se ua ou fiafia i le taeao lenei, o lea lava ua sasaa mai, le mea sa i totonu o le loto. Ua leai se mea e toe lafi ai. O lea e faafogafoga mai Salega, i le ituaiga tagata e tautala i upu a le Alii, i Afioga

a le Atua ae e le o ola ai. Aua e te fua lona olaga i le mea o i ai o ia ma lona aiga. O le a le mea la e i ai ia ma lona aiga? Aua e le mafai ona e tautala i se mea lelei pe afai e fua mai ia te oe o faapefea mai oe ma lou toalua ma lau fanau? O fea o i ai? O lea ou te faitau i mea ia e sau mai fafo.

Tofa OLO FITI AFOA VAAI: Lau Afioga i le Fofoga Fetalai, ia o le a e fai mai la ia te au ae faapefea oe?

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea ou te faitau i mea ia e sau mai fafo i se tamaitai Ausetalia, ua iloa uma lava e tagata.

Tofa OLO FITI AFOA VAAI: Aua e te faitatala, aua e te faitatala, vaai oe, ou te musu e fai atu se tala leaga e i ai lou alo lea e pulapula mai. E pei oe o se faafafine lou faitatala

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea la lea, a pau mai upu i mea Paia ae e le o ola ai, ia ae o lena. O le a matou usi lava le matou faafogafoga ae se i masaa mai lona tagata atoatoa.

FOFOGA FETALAI: Malie le sui usufono o Salega, se i faifaimalie.

Tofa OLO FITI AFOA VAAI: Lau Afioga i le Fofoga Fetalai, Samoa ao outou faafogoga mai, aua ne i outou faasese i upu a le alii o le lalolagi, o le tevolo. Aua ne i outou faasese i upu na, leaga sa ou faatusa ia le osigataulaga i le Atua leaga na osi agai i le HRPP tigaina le atunuu. O le mea lena na ou tago faatusa i le mea lena.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai, e oo foi i lea lea..

FOFOGA FETALAI: Malie le sui usufono...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: E mafai ona tautala mai i le sui usufono e na o upu lava, aumai le Tusi Paia e faasese ai tagata e faagaganaina ai le tiapolo.

Lau Afioga i le Fofoga Fetalai, sau pea, se i o matou faalogologo.

FOFOGA FETALAI: Ia, ua ou... lau Afioga i le sui usufono o Salega, e i ai le manatu o le Nofoa e see ese mai le tulaga lea. Leaga o Samoa e Faavae

i le Atua. Ia ae e pei e foliga e leai e manatu le Nofoa e aua tatou te tatou te talanoa foi lea ma tautau le Alii i se auala foi lea e pei e faatalasua. Ae o lea e manino auofala leai o la e faafofoga mai Taitai o Ekalesia o le aufaitatalo. Ioe o lea e tatou te tapuai i le Atua na Ia faia mea uma. Na Ia faia mea uma, ae o lea foi ua o tatou fesiligia, o le a le mea a le Atua ua fai ia tatou? E pei e foliga o lea e tatou te tapuai ia Paala, o tu na o lea ou te fai atu ai. O le tiute lena a le Nofoa o le fautua atu i sui usufono mamalu.

Ae malie ia le sui usufono, alu atu ia i le Tala o le Tupe ae taatia ia na mea e le mafai ona tuuauloaina e le Malo, leaga o le tiute lea o le Malo o le fesoasoani ina ia faasagatonu ia saunoaga a sui usufono. Ia malie le sui usufono.

Tofa OLO FITI AFOA VAAI: Ia faafetai i lau Afioga i le Fofoga Fetalai, ia o la e foi o le Atua e le silasila i le tagata. E silasila i le loto ma le uiga o faaupuga e na te faia. O le eseese lena o maua ma le Afioga i le Palemia.

Ia o le a ou see loa i Afioga i Minisita lau Afioga i le Fofoga Fetalai. Ia o le a ou amata atu la i si ou uso Minisita lea e pito mai, le Minisita o Fesootaiga. O le aso ananafi sa e faamalamalaina ai ia tulaga o capeways. O le taimi o i le Telecom, o i lalo o le tatou Malo lena mea. E tasi lava ia le tatou capeway sa i ai. E tatou te aia le alu ma le sau traffic, outgoing and incoming e tatou te maua uma na mea o communications. O le taimi lenei, ua 2 capeways, ua tofu ia le Vodafone ma le Digicel ma le capeway. O si tamai % lava lea e tatou te maua mai ai i ina, ona o le eseese. O le fautuaga, e taumafai e pei ona fautua atu le sui usufono o Gagaifomauga Nu.3 ananafi, e toe taumafai e toe sei mai, toe sei mai le vaega lea.

E oo foi la i le tulaga i le tau o initaneti, e le o se taugofie le mea lenei i lau na vaai lau Afioga i le Minisita. Ae o le mea ou te tau fai atu ai, o lea e inu e le Kamupani lea le sua o fesootaiga ia i totonu initaneti, ma le faaaogaina o latou telefoni, toe ai ma le aano lea e maua mai i le latou cable, Tui Cable. Leaga foi o latou e shareholder uma i le Tui Cable. O le tulaga lena o lea ou te tau fai atu ai, e shareholder i totonu o le Tui Cable, ia toe taaalo atu i i. E le o tele la se vaega o maua e lo tatou atunuu ma lo tatou Malo ona o la e matuai tele ai kamupani ia e 2.

Ia tatou tilotilo mai i le tatou Intranet i le connectivity lea e i totonu lava o Samoa. O le tele lava o taimi ou te iloa e le i misi lava se Tala o Tupe ma aumai e miliona, miliona, miliona e ave agai i le SNPH lea matou te pisa atu ai. Lua vaiaso talu ai na ou taamilo ai i Savaii, e na o le 2 lava mea o la e faaoga ai ia mea ia o le School Net, e na o le 2 lava ia faleaoga. E leai ma se mea o faaaogaina o nei mea. E oo foi lava i inei. E 1 le falemai ea e 2 falemai o la e faaaogaina ae e le o lelei foi. E mafua ona ou talanoa atu i le mea lena, o le tele o le tupe e alu i le Broadband lea miliona i mo mea o Tala o Tupe, ae e le o faaaogaina. Ua tou leiloa la po o fea la e avatu tupe lau i ai,

tupe ia. Na ona ou fai atu faapena, ae silasila ane i ai lau Afioga i le Minisita i le tulaga lena.

Ou oo mai lea i le Matagaluega o Tupe Maua, lea foi sa laga ia mea ia o fagumalosi. Se e sao lelei lava ia finagalo o sui usufono sa faaalua. Ae o lau faaalua e faapea o uaina, ou te iloa lava o lena e te silafia le sao o nei mea. E uaina tua ae spirit totonu, leaga na ou alu lelei lava ou inu ai. O le saoga lena o le mea. Ia ae o ituaiga tagata faipisinisi faapea, se e fai foi aikia, aemaise lava ia tama matapii ia. O le fai aikia ia ou te ofo lava pe afai e le o silafia e lau Afioga, o lea ua alo mai i le excise tax, aua e maualalo ia le excise tax o uaina i lo o mea ia o spirit. Ia ou te iloa e tataua lava ona e silafia vagana ua e le faasilafiaina...

FOFOGA FETALAI: Toe 2 minute o le sui usufono. Tulai mai le Minisita mo Tupe Maua.

Afioga Hon Tialavea Fea Leniu Tionisio Hunt (Minisita mo Tupe Maua): Lau Afioga i le Fofoga Fetalai, e le lelei ia lea tuuaiga faapea seivagana ua ou le fia iloa. O faaiuga uma lava e fai o faaiuga e tapena mai e le Matagaluega. Ma ou te talitonuina le matou Matagaluega i faaiuga e aumai ia te au. O le faaupuga lava o le uaina o le uaina. E leai se spirit. A fai mai lava ia le matou Matagaluega o le process o le gaosiga o le uaina lea, ia o le uaina lena. O lena foi e tu mai i fagu o le uaina. Ae a faapea o silafia e le sui usufono le ituaiga gaosiga o lo o gaosia ai, ou te talitonu o lona lava finagalo lea. Ae o faamaumauga o lo o aumai e le Matagaluega ma e sa o e asia le gaosiga o le fagu lea, ia o le uaina. Ma o lea foi ua tapena le Matagaluega i se isi faiga e fai ai e tusa ma le finagalo o le Maota nei. Ae o lo o tapena pea ma fai suesuega. E pei o le tali atu lena ne i faapea ou te le o fia iloa.

FOFOGA FETALAI: Se i malie le sui usufono se i tuu atu lava le avanoa i le Taitai o le Malo.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o le a avatu i se taimi e matou te tali ai ia mea uma lava ia e saunoa i ai le sui usufono, ona o le tele o nei mea, e na o le pau lava le mea lea e aumai, e faaleaga ai mea lelei o lo o fai. E manatua foi o le isi mafuaaga lena na fai ai le suesuega i le talanoaina o le Paketi, i le aumaiga o le mea lea o le generator e mu ai le falepuipui. O le maoae foi o na tuuaiga. E i ai la se taimi mulimuli, ona o tatou agai loa lea i le lipoti lena se i faamatala atu ai le anoano o nei mau otaota e aumai, ae e i ai se taimi e tali atu ai matou, o lea e faafogafoga mai foi ia Ofisa Sili o Pulega o Matagaluega, ona fola atu atoa loa lea o le anoano o le otaota lea e aumai.

FOFOGA FETALAI: Ia ua maea le taimi o le sui usufono. Ia faaiu mai le saunoaga.

Tofa OLO FITI AFOA VAAI: Ia o le a faauma atu, toe pau lava lea ona faauma atu lea lau Afioga i le Fofoga Fetalai. Ona ou oo atu lea i le Matagaluega o Alamanuia ma Leipa. Lau Afioga i le Minisita...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai, ou te fia fesili atu lava po ua fia minute ua uma ea le sui usufono lea?

FOFOGA FETALAI: Ua maea le taimi o la ua faaiu mai le saunoaga a le sui usufono.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Aua e tatau lava ona tatou agai i le tulaga a maea loa le sui ua tatau ona muta lona taimi. Ia a faapea e manao e faaumiumi, ia faatu mai lea o sau lafo.

Tofa OLO FITI AFOA VAAI: Lau Afioga i le Fofoga Fetalai lea ua ou tulai atu...

Susuga Hon Laauli Polataivao Leuatea: Ou te tulai atu ma le agaga faaaloalo lau Afioga i le Fofoga Fetalai, ni afa au, o le tagi a le pumate aua le sui usufono mai Salafai e faatu se lafo pe talia pe le talia ou te manatu e taua finagalo o le sui usufono e le i taitai uma le tapenaga a le sui usufono. E faatu se lafo e faaopoopo se 15 minute o le sui usufono o Salega ma lou faaaloalo.

FOFOGA FETALAI: Ou te faamalulu atu, ua tautuauega le tulai mai o le finagalo o le sui usufono, ae ua fai lau faaiuga faamaea mai lau...

Tofa OLO FITI AFOA VAAI: Ia o lea ua ou tulai atu e faalua, ia po o le a se finagalo. Ia ui i lea lau Afioga, faafetai tele lava lau Afioga i le Laaulialemalietoa...

FOFOGA FETALAI: E faamanatu atu, o lea ua outou faafofoga i le finagalo o le Taitai o le Malo, ioe e ono masalomia foi le tauaveina e le Nofoa o le tatou galuega. Aua e fai foi o le faaaloalo atu i sui usufono mamalu, ae o la foi e i ai foi le finagalo o le Malo e faaauau le tatou galuega

ona e tele ia faiva ma tiute foi o le Kapeneta. Ia o le mea la lea, e faamolemole, ua uma lou taimi. Faaiu mai lau saunoaga.

Tofa OLO FITI AFOA VAAI: Faafetai, o lea ua faauma atu, e pau lava lea o si vaega lea sa ou fia oo atu ai i le Minisita e na o se tasi lava ia si mataupu lea...

FOFOGA FETALAI: O le a tatou toe talatala foi la i tua, aua e i ai le ituaiga faauma foi lea e na o le ooti lava tulai mai se isi sui usufono e saunoa. Ae o le ava fatafata, i le faafofoga mai a le itumalo ma le atunuu. O lea ou te tapa atu faapena e faaiu mai le saunoaga, o lou itumalo ia manuia ia le tapuaiga, ia ona uma lea i lo o le sesele motu foi lea ona faapea e leaga e le o tatou o ni tamaiti. Tulou i sala le gagana.

Tofa OLO FITI AFOA VAAI: Lau Afioga i le Fofoga Fetalai sa e faafofoga i le saunoaga a le sui usufono o Gagaifomauga Nu.3 e na o au lava le sui usufono e sao ma ou te faaaloalo tele i lau Afioga. O lea la ou tago e faaiu atu lau.. ona e silafia lea o le sao.

Lau Afioga i le Minisita o Alamanuia, se e i ai lava si au fautuaga lea e fai atu i lau Afioga...

FOFOGA FETALAI: O le a fai la lou finagalo, ae tuu lou loto.

Tofa OLO FITI AFOA VAAI: Ia o le a faauma atu la i se taimi, o le a usitaia le faatonuga a lau Afioga.

FOFOGA FETALAI: Ia, o le a fai la lou finagalo ae tuu lou loto.

Tofa OLO FITI AFOA VAAI: Ia o le a faauma atu la i se taimi, o le a usitaia le faatonuga a lau Afioga. E ui lava e le i uma lou taimi ae ua faaoloataua le Palemia, ia ae o le a le afaina lea. Ae momoli atu le faafetai tele.

FOFOGA FETALAI: Ia, ne i outou pea mai ua control foi.

Tofa OLO FITI AFOA VAAI: Leai o lena e control ae o lea o le a faauma atu. Lau Afioga i le Fofoga Fetalai...

FOFOGA FETALAI: Ne i outou pea mai, leaga o lea foi sa outou tuuaia le Kapeneta, ne i outou faapea mai o lea foi ua limataitaiina foi se manatu o le Nofoa ma le Fofoga Fetalai i se fautuaga ma se finagalo o le Palemia, e leai. Na amata ona e saunoa i le ta tonu lava o le 10. Vaai foi o lea ua 10:38 minute a o lea o le a faasolo atu i le 40 minute o lau lauga. O lea la e lavea

ai ma le taimi foi lea o le lavea i totonu i le taimi foi lea o faauilavea. O le mea la lena ua ou manatu, alofa ia le sui usufono, e le faapea ua fai mai le Palemia e tatau ona fai lea ma lea, e leai. Ua ou manatu...

Tofa OLO FITI AFOA VAAI: O le a le faataumatatao i le fanoga o lau Afioga i le Fofoga Fetalai, ou te usitai foi, o lea foi la ua faauma atu ma le matou lauga. Atonu e maua se taimi, ia e faamalulu atu pe a faapea ua sala le gagana pe paopapa foi se leo o Salega i le tatou faamoemoe i lenei aso, a ia manuteleina lau Afioga i le Fofoga Fetalai ma le mamalu o le Palemene nei. E faafetai atu foi i le paia ma le mamalu o lou itumalo mo le tapuaiga, aua ne i outou faasese i upu a le Palemia pei ona saunoa i ai. Praise the Lord; Amene.

FOFOGA FETALAI: Se soia e te taufaalili sole. Ia ua lelei. Malo faafetai. E faapena, o le tatou Fono, o le Fono a tupu ma ee o le atunuu, ae saunoa foi ma fai fuafua. Ia e faamalulu foi i se isi itu, aua foi le avea le se ma mea mamafa i finagalo o lea itu o le Maota i le Malo, e faapena lava aulape o mea nei o lauga. Ia ua masani ai lo outou paia maualuga i lau Afioga i le Palemia, o lenei ua 30 tausaga o e feagai ma le taitaiga o le Malo, ua masani lau faafofoga, ua masani foi lou feagai ai ma lauga a sui usufono mamalu e tusa ai lea foi itu o le Maota i lo latou foi naunau mai.

E i ai se isi sui usufono e fia saunoa, tulai mai. Ia, tulai mai le sui usufono mo Falealili Sasae e saunoa, se tasi o sui usufono mo Falealili e saunoa e tusa ai o le Tala Autu o le Tupe ma le Tala Faatatau Faaopoopo o le Tupe. Falealili Sasae, tulai mai.

Afioga FUIMAONO TEO SAMUELU TEO: Faafetai i lau Afioga i le Fofoga Fetalai, tau ma le Nofoa e tau faafoefoe le Fono i lenei taeao. E momoli atu le faafetai tele i le toa aemaise foi o le tofa i le silasila mamao ae tainane foi le faafofoga tapuai a si o tatou atunuu o Samoa. I lenei taeao, e logo eseese le faalogo, ia a o matou foi, e ese foi lo matou fiala e faalogo atu i sui usufono matutua o le Palemene ae susufi le tofa ma tatala le tau. Aisea? Matou te aoao ai manogi, e aoao fatumanava aua se tofa e saili foi aua so matou sao i upufai o le Palemene.

Ua ou manatua lava i le taeao lenei se tasi o failauga e pei ona tau maua atu, a o lea lava e lauga faafaifeau le tele o sui usufono, o i e iloa ai o lea lava e pipii lava i le Faavae o Samoa e Faavae i le Atua. O se tasi failauga ua tofi e le faifeau e taitaia le sauniga, ua sau tau i lona toalua o ia e lauga, ona alu lea o le faletua nofo i le pito lava i luma, ina ia iloa mai ia e lona toalua lea e faia le lauga. Ona tago loa lea faamatala le tala lea ia i latou foi ia na lafo i le ogaumu aasa. Ia ua alu loa lea o le faamatalaga a le failauga ma fai mai, le faatuatua o tama nei e toatolu, Sataraka, Mesako, ia ae galo loa ma le igoa e tolu ai tama. Ia toe taamilo le lauga, ioe, a faapena le tatou

faatuatua pei o Sataraka, Mesako, e faatolu lava ona taamilo le lauga, fai atu loa ma si ona toalua lea e i luma, “o Apeteniko.” Fai mai loa ma le toeaina, “lea, Penitito.” Ioe. E faapena le taeao lenei, leaga e eseese foi le tou faafofoga, o nisi lava e faalogo o Apeteniko, a o nisi foi e tau matau o Penitito.

Ia, e manatu o lea ua tafatuseuga lo outou sa i auvai ma ua malu le fau i outou faiva a manaia, e manatu foi o lea ua logopualilo nai lo outou utafanua ae ua mu totototo lo outou suniula. O lea ua talatala le titi togotogo sa momoo i ai tausala o Samoa, a o se too sa matau i ai folauga, ma le ilaoa sa faailo ai pitofanua aua galu feai o le vasa. E faatulou ma faapaimalu i o outou feaoga, tainane tautapa faalupelupea o Samoa, lea ua tauaofia le Fonousu a Samoa i ona tupu ma ona ee, o lupe sa faia mai le fuifui, aua foi le lausasaaina o le tofa ma le faautaga i le Maota aua Samoa mo a taeao. E maualuga lava le taofi o le Maota lenei o Samoa, o le liulagi o le talitalitama e fatu ai le titi o Samoa, e utuutu ai le salefu i le tofa ma le utaga, e malie ai le Fenunuivao i le fetuleni mai o faafitauli o le olaga, e avea ma vaa seuvale a o folau le sa o Samoa i lagatonu. A o le matau a atunuu i fafo aemaise o atunuu o le Pasefika, a, Samoa ua siisii lou tulaga, lea ua lele maualuga i na atululuga ua le toe laalaa i luma i lona tamaoaiga, lea ua tatou fefaasoai ma fefinauai i le upu faa-Peretania o le deficit ma aumai ai le Tala Autu o le Tupe ma faaautuina faapea e toe autalu. Ae tau lava ina ou faamanatu pei ona sau foi i le saunoaga a Lufilufi, aua ne i autalua fua ne i te i ua autalu atu ai ma maumaga o isi tagata. A o aso ia...

FOFOGA FETALAI: Malo. Ou te faauilavea i le saunoaga a le sui usufono, ia, ua manatu lava e manaia, ua oo foi i le taimi e taofiofigata ai le saunoaga i le tulaga o le sologa lelei, ona e noatia lava se manatu i le tatou taimi e limataitaiina ai foi le galuega. Ona faapea lea, ou te faamalulu atu i lau Afioga...

Afioga FUIMAONO TEO SAMUELU TEO: Aua ia, e usitai lava le sui usufono mo Falealili Sasae i le Nofoa leaga e ava atu.

FOFOGA FETALAI: Faafetai. Ona o lea ua tatou taunuu i le tatou malologa masani, o le a faaauau le saunoaga pe a tatou taliu mai.

Ou te faasilasila atu o le a faia le malologa a le Fono Aoaofa Faitulafono mo lana malologa masani.

Na faataatiaese Galuega a le Fono Aoaofa mo lana malologa masani i le itula e 10:45 i le taeao ma toe faaauau i le itula e 11:37 i le taeao.

Na toe faaauau felafolafoaiga i luga o le Tala Faatatau Faaopoopo o le Tupe (Nu.3) 2019/2020 & Tala Faatatau Autu o le Tupe 2020/2021.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoao Faitulafono.

Ae le i tuuina atu le avanoa mo le sui usufono sa faia le malologa o lo o faapena ona saunoa, ou te tapa le... Ia, talu ai ona o sina taimi puupuu ona taunuu mai lea o le Palemia e faatu se lafo, ae ou te tapa le sui usufono mamalu mo Falealili Sasae, e tulai mai e faaauau le saunoaga. Lau Afioga i le sui usufono mamalu.

Afioga FUIMAONO TEO SAMUELU TEO: E manatu o lea ua matu fau aua le tauteaga ma le taligasua i le Palemia faapea foi le Sui Palemia ma le Aiga Kapeneta, ua tali foi le sua i lau Afioga i le Fofoga Fetalai aemaise foi sui usufono mamalu o le Palemene, a o se faasiligamalosi i Ofisa Sili o Pulega o Matagaluega ma le au galulue, ona i ai lea o le manatu, faafetai. Se i toe tau amata atu se tala a Falealili.

E manatu e le mafai ona alulua, e ta liu ae popoe aua le tapuaiga a Samoa, aemaise foi o le malumaunu o le fogatia ua malualii le seuga i lenei taeao, aua le potopoto ai o le Palemene pei ona fai atu i le taimi ua sola, ia, e faatulou lava ma faapaimalu atu i o outou feaoga, e i ai le lagona tulou outou mailiili faafaleepa, aua e tua faasagamau i ai le tapaaui o le manino, aua le navenave ma le lilipi tialologo o le toau manunu i lenei taeao. E faatulou i paia ma ee o le Maota e loloma faatuli o matuu i ai le tuliagamagalo, o le sailigamalo mo se manuia o Samoa mo a taeao. O le ala lea o le tautapatapa ae a faatafatofa le siliaga ona gase lea faaave o le fetugoto. O le soifua finafinau mo so tatou lumanai manuia, atoa ma lo tatou ola taumafai e fai mea sili. Ae a le felagolagomai ma tutu faatasi, ona taunuu ai lea o le upu e fai i le lupe sa olotu i le tauvalevale, ua le toe aoga ona lele ese ma le fale. Aisea? Aua ua le uma se mua. Ona taunuu lea o le upu, “ua tautua Vaea ae alu Apaula ma le tagiaau ma saili le tama po o pepe.”

Ua taoto la aputiputi o le tauluulufau o le toalafanau o le aganuu ma le faaautama o le agaifanua o le nafaola, o le faasinomaga o le Samoa faamaoni, lea ua fai ma filimamate o le piiama ma le piioa, e faufau ai aonuinui ma aosisili o le autalaia ma le aupuputoa, o le ala lea o le lagalaga o se leo.

E faatulou i le afio o lau Afioga Mamalu O Le Ao o le Malo, lau Afioga i le Tuiaana Tuimalealiifano Vaaletoa Sualauvi II ae tainane lau Masiofo. Tulou lau Afioga i le Sui o le Fono a Sui Tofia, lau Afioga i le Alo o Tuiaana Sagate i lau Afioga Le Mamea, vaeane Tapulesatele o le alo o Salamasina o le uluai tupu tafaifa ia Samoa. E le faaitiitia le agaga faafetai i le aufaitatalo i le ao ma le po o lo o nonomanu ma tapuaia o tatou faiva aua se manuia o

Samoa. Le sa folafola o le talalelei i le nofo a Faafeagaiga i fatafaitaulaga e fia, faafetai i la outou tatalo, ua manuia Samoa ona o a outou tatalo. Ua filemu le atunuu ona o la outou tuualalo i le Atua.

E faatulou atu i le tafatolu fefaatauagai o le Malo i le tatou Faigamalo o Samoa. Tulou le afio o lau Afioga i le Palemia ma le Aiga Kapeneta, tulouna le afio o lau Afioga i le Fofoga Fetalai ma sui usufono mamalu o le Palemene, tulou le afio o lau Afioga i le Faamasino Sili ae tainane Faamasino o le Faamasinoga. E i ai le manatu e auala atu i so matou avanoa faamanuiaga mo lau Afioga i le Faamasino Sili, sagai ane ai o le tai, ia faaosofia moegaluaga, tatalo i le Atua e to mai le faamasinoga tonu, le faamasinoga e faataunuu ai faaiuga a Samoa. Ia o ou mama na ma ou faiva na.

E le faagaloina le aufaigaluega tofofi i totonu o Matagaluega i Ofisa Sili o Pulega, pei o latou ia o lo o lima ma vae i ai feau ma tiute o le Malo, faatalanoa a o latou e faatino. Malo le galulue, e le pau fua lo outou afu, lo outou le faalogologotiga. Ia faamanuia le Atua e tusa ai o galuega lelei i lo outou tautua atunuu ma lo outou tautua Malo.

E le mafai ona alulua, e le mafai ona matou faagaloina le tapuaiga a le va tootoo o Samoa aemaise Puleono i Salafai. Tulouna Lalogafuafua aua le Tuiatua ma ou tafai, taalolo le susuga i le Tumua, Lufilufi ma Aiga o lo o e tausii, aua Ao o Atua, Uso o Atua, Iu Atua, Atua le Tonu, Atua le Faiga ma Atua le Fauono.

Tulouna Malie ma Vaitoelau aua le Susuga i le Malietoa o le Tama a le Tuamasaga, taalolo le Gatoaitete ma ou tuitui le susuga ia Tuisamau, Auimatagi ma lo outou auvaa na tautailua, o le Tumua aua le Itutolu o Sagaga ma le Faleono o Leatigaga o Faleata ma le Gafa.

Tulouna Maauga ma Nuuasala aua le Tuiaana ma ou tafai, taalolo le fetalaiga ia te oe Leulumoega ma Aiga e 4 o lo o e tausii. Taalolo le fetalaiga i le tootoo o Maauga.

E faatulou foi i Puleono i Salafai. Tulou le tupua i Fuifatu, taalolo le fetalaiga ia Tuilagi ma Namulauulu o e na pule, tootoo o Fuifatu ma upu i le Faasaleleaga.

Tulouna oe le tupua i Vaituutuu, taalolo le fetalaiga ia te oe na pule Saleaula ma tootoo o Vaituutuu ma upu i le Gagaae o le Mauga.

Tulouna le tupua i Finao, taalolo le fetalaiga ia te oe na pule Lavea, le Alii o le Itu o le ao o Savaii o le tootoo o Finao ma upu i le Gagaifoolemauga.

Tulouna le tupua i Vailoa, taalolo le fetalaiga ia te oe na pule Palauli ma tootoo ma upu ia Palauli.

Tulouna le tupua i Faletoi, taalolo le fetalaiga ia te oe na pule Asiata, na falefa ia te oe Tumua ma tootoo o Faletoi ma upu i le Alataua.

Tulouna Matia ma Matia Ituau, taalolo le fetalaiga ia Fao ma tootoo o Vaisigano.

Tulouna Sua ma le Vaifanua, o Fofu ma Aitulagi, Saole ma Saleaamua ma le Launiu na Saelua. Oe le Ituau malosi ma le Alataua, aua le Kovana Sili, le Lutena Kovana ma Maota e Lua. A o mamalu aua le Laau na Amotasi, Tootoo o le Faleula, Tauaitu ma Tautagata, Samatua, le Faletolu ma le Falefa, le Pulefano ma le Vaigalugalua ma upu i le Manuatele. O Samoa mamala na, o Samoa mamana na. A fesili le Maota Fono, aisea ua oooo ai le sui usufono o Falealili i paia ia? O paia faataotooto na o Samoa e mamalu ai le Maota lenei. Aisea? O lana tu ma lana aganuu. Ua iloa aiga, ua iloa tootoo, ua iloa faleupolu. Ua maape Samoa ua uma ona tofi, ae mamanu lava tatou i le tatou aganuu. Aisea? Sa o tatou ola mai ai, sa o tatou asa mai ai. O lona uiga, e leai se mea fou aua o lo tatou olaga lea.

Faafetai i lau Afioga i le Minisita aemaise o le Ofisa Sili o Pulega o le Matagaluega, e oo atu sina faamatalaga ma se sao o lenei itumalo i le Tala o le Tupe, e le faigofie, sa outou punouai e taufaasoasoa, sa fai le galuega a Lufilufi e selemalelei, e tufa ia tofi le tagata ma si ana ia. Ae a faatusatusa foi i le tulaga lamatia ma le faigata ua i ai si o tatou atunuu, e le taumatea e le fesiligia. Afai ua pau le Tala Autu o le Tupe mai le tausaga ua tea, ua sala ina pau, ua feagai tatou ma faamai ua aafia uma ai le lalolagi. O le mea lea e avatu le faamalo. Ia, tau ia ina ou faapea atu, e i ai nai vaega e avatu ai le tuualalo ma nai vaega ua ou fiafia ai. Aua tasi lenei vaega sa ou tatalo ai i le suavai o si ou itumalo i vaega e leai se suavai. O lea ua matau atu i le Tala Autu o le Tupe, sa \$2 miliona talu ai a o lea ua toe faaopoopo le isi \$2 miliona i lalo o le malosiaga o le EPC ma le Ofisa o le Vai. O lona uiga ua tai \$4 miliona ina ia faaauau le auaunaga lea ia i latou e limavaivai ma le tagolima. Ma o lea sa ou fesili ananafi i le tamaitai e vaaia le suavai ae fai mai e leai se tupe, a o lea ua ou tilotilo atu i le Tala o le Tupe, e \$2 miliona lea ua faaopoopo i le \$2 miliona talu ai. Ia a leai la se tupe o lea e i ai le tatou tupe e faagaoioi ai a tatou galuega aua i latou o lo o moomia le suavai? E faapena foi i le EPC lea foi ua faaopoopo le isi \$2 miliona. Faafetai. O le auaunaga lea o lo o manaomia e le atunuu lautele. Faafetai tele lava. E le toe tatalo foi i le Minisita o Galuega e tusa ai o le suavai lenei, aua o lea ua matau atu o le tala, a pasia loa ua faatino. Faafetai. Faafetai foi i le penisione a nai matua aua ou te iloa o le faasologa uma lava lenei o lenei Paeaiga ma lenei foi Palemene e oo lava ina matutua, ou te iloa foi e i ai nisi o la ua oo i le tausaga lea.

Ae o le tuualalo lau Afioga i le Minisita, ou te iloa o la e i ai le faamanuiaga lea mo nai tagata matutua foi nei e feoai fua i le vaa ma talafua a latou fualaa. O le a le mea e le taatia ai lea mea ae faaopoopo pea le latou tupe lea penisione nai lo le \$160 ae faaopoopo le \$200 i le masina, ae tuu le vaega lea e feoai fua ai i luga o vaa, aemaise foi o le talafua ai o fualaa. Aua o le upu moni, so o se aiga lava e i ai lava le auala, e tasi si toeaina e i ai lana penisione, e tala uma ai fualaa a le aiga i le vaega lea. E faapena foi, e faaitiitia ai le feoai i luga o tatou vaa, aua o le isi lava toeaina pei e fiafia e

alu fua, e tiga lava ona leai se mea taua, ae sau lava i Upolu ma alu foi i Savaii. Ae a faaopoopo le tupe lea i luga o le penisione, ou te iloa o le a fiafia o le a tele se faamanuiaga e maua i le masina. Ia na o se tuualalo, e pei ona ou fai atu, o nai motugaafa a Falealili e tuu atu i ou autafa.

O le 2% o lo o faasafua i tatou commercial bank. E talitonu le mafauafau e tau loa commercial bank, na o i latou e i ai aseta tetele lea e ave i ai le faamanuiaga lea. Se i toe silasila ane lava, o lo o i ai nai isi a tatou finance institutions, e i ai nai a tatou kamupani na, o le tele o le afaigaluega e oso i ai foi lele pe a sau le faalavelave faafuasei e aumai le \$500, e aumai le \$800, e aumai le \$1,000. Pe le oo i ai lau silasila faamolemole, faasafua i ai le tamaoaiga lea. Aua e oo foi i sui usufono o le Maota lenei, e faaoga foi nai vaega faapena pe a tutupu mai faalavelave faafuasei. Ae peitai, e le o lavea i lalo o le faamanuiaga lea. Ia, na ona tuu atu i ou autafa e toe silasila ane i ai.

Ma le isi lava vaega faamolemole, pe i ai se fua faatatau e tau control ai interest a tamai finance nei. O le \$1,000, o le \$2,000, a o le interest ua 21%. A faatusatusa la i tatou faletupe, pei ua tele tele, tusa e tuu i ai ma le taimi lea e manao e totogi ai, ua atili ai le afaina o le sui ua leai se tupe. Ia o nai motugaafa e tuu atu i ou autafa.

O le \$35 miliona lea e faasafua e le tatou NPF i le aufaisaofaga, e pau lava le fesili e le faapea o se tulaga lagavale, pe faapefea ona faasoa le vaega lea? Po o le mea o le a taoto lava i le Komiti Faatino o le NPF e faasafua i ai aua e tatau foi ona lavevea ai ma sui usufono latou i le vaega lea i faamanuiaga aua e faisaofaga, a o le a le taiala o lo o faaoga.

O le tulaga foi ia i le vaega lea o pisinisi, o lo o i ai le tatou system lea e faaoga i tax lau Afioga i le Minisita o Tupe Maua. O le tagi lava a le pumate, o lea ua matau, pei e foliga e le o i ai se vaega autu foi lele e aumai uma i ai le system lea, a o lea e tau faatalatalanoa, e pei o se software e aumai lava ona insert lea i totonu o latou masini po o cashier, a o lea e faatalatalanoa mai nisi o faipisinisi, o le tau maualalo lea e i ai, masalo e le gafatia, e ova i le \$10,000+. Po o le a se faiga ma tagai i ai ina ia i ai se faamama avega aua o lea ua pasi le Tulafono. Na pau lava le mea pe mafai ona tau tuutuu laitiiti atu i tua, seia uma le faamai ona faagaioi lea. Ua lava a i pisinisi tetele lea e i le taulaga, a o nai pisinisi foi ia la e tau, ia na ona tuualalo atu, pe i ai se mea ina ia centralize ai le aumaiga o le system lea ona tufatufa lea i faleoloa, ona fai lea po o le a se feagaiga e fai i faleoloa, pe totogi le afa faaoga le system ae togitogi, ia, po o le a se isi vaega ina ia subsidize e le tatou Malo e faamama avega foi i le aufaipisinisi.

Ia ona oo mai lea i lalo, faamalo i le...

FOFOGA FETALAI: Malie le sui usufono se i tulai mai le faauilavea a le Minisita mo Tupe Maua.

Afioga Hon Tialavea Fea Leniu Tionisio Hunt: Lau Afioga i le Fofoga Fetalai, atonu ou te tulai atu ona atonu e i ai foi nisi sui usufono e toe talanoa mai i le system lea a le Matagaluega o Tupe Maua.

O le agaga na aumai ai le system lenei ona o le tele foi o faitioga sa oo atu i le Matagaluega i le le paleni, faapea o lo o totogi lafoga isi ae nana lafoga a isi, le totogi lafoga le GST, ona sue mai lea o le system lea e laugatasia uma ai. E tele itu lelei mo le lafoga nei, e lelei mo le faipisinisi, e lelei foi mo le au faatau, aemaise foi o le lelei mo le Malo. Tusa e 5 vaega ia, kulupu ia e vaevae i ai le taimi e amata ai lea kulupu ma lea kulupu. O le masini lenei na talanoaina i le Tala o le Tupe i le tausaga talu ai ona tatala lea i le aso 4 o Mati i le tausaga lenei ma ave ai le avanoa i le kulupu 1 lea tusa e 210 pisinisi. E 4 masina lea na ave ai ia oo mai i le aso 1 o Iulai ua mafai ona comply mai ma faaaoga le system ina ia amalia ia Iulai, ma e le toloa foi. E amata le system lenei ia Iulai. O latou uma nei i le 210 lea, e talosagaina le oo mai i le Ofisa e faatalanoa, ona i ai lea o le amataga e amata ia Iulai, ona faaasolosolo atu lea i tua, 3 masina sau le isi 1,500, 3 masina i tua atu sau le isi \$1,500, 3 masina i tua atu sau le 2,000, a o le vaega mulimuli lava e 5, e 3,000. Tusa e 8,210 pisinisi. Ma o le faamoemoega o le masini lenei ina ia mafai ona ao uma lafoga ma tutusa uma ai tagata e totogi lafoga. Aua o le tulaga lea e i ai, na ala ai ona aumai le system lea, ina ia mafai ona ao uma mai le GST mai kamupani uma lava. O kamupani lava ia o lo o faamaoni, faafetai. A o le auala lea na aumai ai ina ia tutusa uma ai aua o le tele a lea fai mai o lea e nana lafoga a isi kamupani e le o mafai ona aumai lea na sue mai ai le system lea ina ia faaaoga. E aoga foi mo le aufaipisinisi e puipuia ai tagata faipisinisi totogi lafoga ia tutusa.

O le 2, ia manino faamaumauga e mafai ona tali atu i mataupu tau lafoga. O le system lea, e mafai ona tau mai ia i matou, ua matua gau le kamupani i le latou tupe maua. E faigofie ai ona faatino ia latou refund i le taimi e avatu ai le GST, ona e avatu le latou claim, e 2 masina ma avatu. Ua silafia e le Matagaluega le aofai o le lafoga la ua mafai ona aoina mai i le 2 masina lea. E tusa o le VAGST, o le faaaogaina lena o le masini lenei. E tusa la e aoga foi o le a mafai ai ona ao lelei mai le lafoga a le Malo. E leai lava se mea e talitonu foi e i ai togafiti a le aufaipisinisi foi ia e ono fai i le mea lea, ae fai lava sina malolosi o faasalaga. O le fautuaga la ua avatu e ala atu ia te au i pisinisi uma nei. Agai ane i le ofisa e faatalanoa, ia oo atu i le aso 1 o Iulai o le tausaga lenei. A le oo mai, le \$210 lea, e okometi lava i le alu atu o le penalty. Ae a o e faatalanoa le Matagaluega ona fuafua lea e le Matagaluega e faatalanoa atu nisi aiaiga o le lumanai, faasolosolo atu o le \$210 lea, talosaga ia oo mai uma i le ofisa e faatalanoa, po o a auala e faigata ia i latou. A o le suesuega lava a le Matagaluega, o le \$210 lea, o kamupani nei ua i ai masini e mafai ai ona faaaoga le systema lea. O lea ua ala ai ona faamuamua i latou, o le toatele lava la o le vaega lea e i o pisinisi lapopoa, ma pisinisi lava ua mautinoa e le Ofisa o lafoga, e mafai ona latou faaaogaina le system

lea. Faamalulu atu i le sui usufono, e le toloa, e amata i le aso 1 o Iulai le system lea. Faafetai.

FOFOGA FETALAI: Malo, tulai mai le sui usufono toe 2 ou minute.

Afioga FUIMAONO TEO SAMUELU TEO: Faafetai i le faamalamalama a le Afioga i le Minisita, e le o au lea e tatalo atu e tolo, o le finagalo o nai aufaipisinisi i le itumalo, o lea ua faafofoga mai le aufaipisinisi a le itumalo. E amata ia Iulai, o mai e totogi a outou lafoga ma avatu ia a outou masini. O le mea lea na ou fesiligia, o le vaega e maua ai le system. O le vaega faigata lena ia i latou, e pei e foliga e eseese uma tau. Ae a o atu foi, o lea ua sii i luga le tau talu mai le tatou faamai. E pei o le ala lena o le tatalo atu, ae faafetai o lea ua manino ma malamalama.

Ona ou oo atu lea i le vaega lea o le tatou adoption, ia faamolemole, si vaega lea lautele e mafai ona tagai i ai, aua e eseese uma lava fees a loia i le mea lea o le faaliliuga o tamaiti. Ae pe na ou matauina i aso ia, sa fai e le ofisa o le faamasinoga, o le Resitala le vaega lea. Pe le mafai ona toe foi i ai lena faamama avega i le Resitala ma i latou e faatinoina mo le mamalu lautele o le atunuu. Aua o le upu moni lava a liliu le isi tamaititi e \$3,000 le pili a le isi loia, \$2,500 le isi loia, e eseese uma lava pili. Ae pei e manaia le faamama avega lea na sau ai tatou. Tuu i le Resitala, le malosiaga o le Resitala e faafaigofie ai foi. Ona tuu lea e fia e faatalitali le adoption, e uma lava le 6 masina, tausaga, o la e tuli lava le loia ma le adoption, ma lou faaaloalo.

FOFOGA FETALAI: Se i tulai mai le Minisita mo Faamasinoga.

Afioga Hon Faaolesa Katopau T. Ainuu (Minisita mo Faamasinoga ma ma Pulega tau Faamasinoga): Faafetai mo lou avanoa. O le mataupu lea, e leai se tatou malosiaga. E leai se malosiaga o le Malo, e fuafua ai fees a loia. E pule lava loia ia latou fees. O le mea lea sa laga e le sui mamalu sa fai e le Ofisa o le Resitala le matafaioi lea, e pei o le mea lena o lea sa tele ai le numi, ona sa taumafai foi le Ofisa o le Resitala e fai le galuega, ae o lea ua tuu tasi lava i tua i alii ma tamaitai loia. O le mea lena e le mafai ona fuafua atu e le Malo ia fees a loia. I le ava ma le faaaloalo.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e toe faaopoopo atu i le saunoaga a le sui usufono. Sa aumai le Tulafono masalo po o le 7 tausaga talu ai, ae sa matua vevesi ai loia ina ua fai le Tulafono lea. E le gata la o tau o loia, ae o le aiaiga ina ia sue a latou

tusi, ona o le tele o kamupani loia, e aafia ai foi ma Niu Sila, e o atu le au suetusi e sue a latou tusi, ae ua faaaoga a latou tupe e teu faamavaega. O Niu Sila lea ou te tau manatua nei, pe faa-4 ea a le faa-4 e faa-3 na sue i le tausaga e le au suetusi. Ona o le tele naunau o le mau solitulafono i le mea lea, e faaaoga e kamupani loia ia tupe a tagata latou mavaega e fai ai mo a latou fanau mo le lumanai. O lea ou te tau manatu pe a ma le 3 lelei pe 4 ia Attorney Generals na ou fautuaina e fai le Tulafono lea, ae na fai la e le Attorney General i tua atu o le Nofoaiga lenei. Ma o lea foi na aumai i le Maota lenei ma pasia ai. E pasi ane le Tulafono lenei, o le matua tele o le tetee a loia. Na aumai lava le Tulafono pei ua tuutuu ae i luga le level o fees a loia. A o le mataupu o le a toe tilotilo i ai, ona o le tulaga lea ua matua taugata tele. A o le tele o nei loia na ave i tupe a le atunuu, na ave e faasikolasipi. E pei ona silafia o le taimi lenei, ua le o toe soona avea ni sikolasipi i loia ua tele, ua le iloa po o le a le mea o le a fai i le tele o le mau loia. O lea la o le a ou toe tilotilo i ai i le tulaga lea, ona ua oi le atunuu, o isi loia e faapasene ona fai a latou fees. O lona uiga afai o sau loan e \$500,000, ae 10% ua tietie ai i luga ma le \$50,000 a le loia. O le matua tetele, ae a e alu i le fomai na o le \$20, \$30. E faapena foi accountants e le maua luga tele ni a latou fees. Ae o loia lava latou, ua matua sao le mea lea e aumai i le faapopolega o le sui usufono. O le tulaga foi i mea ia o tatou pepa o adoption, lea e aofia ai i le mea lea. Ae pei e sili ona toe taatia mai lenei mataupu, se i toe tilotilo pea i ai, aua e sao le sui usufono sa fai muamua foi e le Ofisa lea o le Resitala o le faamasinoga, sa masani ona ou auina mai i ai, i nisi foi aso ua tuanai, e fai ia pepa o vaegatama. Ae i ai lava le mea tele lea ua tupu nei, e lavea tele ai tatou i Niu Sila, o lea foi ua ou vaai atu ua lavea ai Ausetalia. O le o mai e vaetama atu fanau a uso ma tuafafine, e avatu e saili ai lo latou lumanai. Ae sue atu e latou e vaai mea ia i atunuu ia, o la ua sue tupe ai. Ua tapa tupe a tamaiti ona ave ifo lea faaaoga e latou ae le lelei ona faaaogaina fanau. O le isi ulugalii e oo i le 20 adoption, 20 tamaiti i Niu Sila. I Ueligitone na faasalalau ma falepuipui ai le ulugalii lea o se faafeagaiga. Ua 20 le aofai o tamaiti ua adopt, ae avatu o le mea lea e pito sili ona taua ia latou o tupe a tamaiti ae le o lelei ona faalavalava tamaiti, mamai. Aemaise lava taimi ia o tau malulu. O le tuualalo la i le toatele o matua, ia matua faaeteete i le mea lea o le adoption, e matua faaeteete. Leaga ua i ai foi pisinisi i fafo, a avatu la i ni matua po o le uso i fafo ae o la tetele aitalafu, e ono toe nofo ma toe i isi. E oo foi iinei, faaeteete i le mea lea o le o mai o papalagi e adopt a tatou fanau. Sa i ai le mea faapea na tupu, ona ou tapaina ai lea Attorney General e toe silasila i le mea lea, leaga e i ai tagata Amerika na o mai adopt atu tamaiti. O le matua matautia o le mea lea e fai nei i pisinisi a isi tagata, e adopt le fanau a isi, ona ave lea e ave e sell, faatau. Ma o ituaiga pisinisi ia e i le tulaga foi lea, o falemataaga ma mea faapena. I aso nei ua matua tele le ituaiga pisinisi faapena. O lea la ua fai lava sina mamafa o le tulaga lea ua i ai i le taimi lenei o le vaai o mea nei, e mata vailiili ia aiga e ave i ai, pe

gafatia. Aua o ituaiga uiga na e tupu, pe a avatu i le aiga ae toatele le fanau la e i ai, o lona uiga e le o avatua i se tulaga moni, ae o lea ua sue tupe ai. Ma ua oo atu ia te au ia nisi o aiga ua le toe fesootai ma a latou fanau, aemaise lava Ausetalia.

Lau Afioga i le Fofoga Fetalai, o le taua ia o le mea lea, ua umi ai lau tautalaga i le tulaga ia o tatou aiga, po o le uso po o le tuafafine, ia matua faaeteete i le mea lea o le adopt, vaai e isi a ta fanau. I le mea lava lea o le faigofie, alu le tama ma le teine i fafo e sue ai lona manuia, ae uma ifo ua malaia ai. Lau Afioga i le Fofoga Fetalai, leaga o le tupe lava lea ua tele ina afaina ai le tele o le tatou atunuu ma ana aga o lo o fai nei. O lea foi e oo lava i le faamatai lea ua lamatia ai ma le faamatai, i le soona fai o matai sao o aiga. Ae afua i le manao i le seleni ae lafi i tua o le faasafua i le la ituaiga ma lea ituaiga, ae lafi ai tua le agaga moni o le saili tupe ai. Lau Afioga i le Fofoga Fetalai, e taua tele mataupu ia e laga mai e sui usufono.

FOFOGA FETALAI: Malo faafetai. E le gata i le sui mamalu o lo o saunoa i le mataupu leni ae faapea foi le Palemene aemaise o le faafofoga mai o Samoa. E aoga tele le saunoaga a le Palemia i le faafofoga tapuai mai o Samoa leaga o la e i ai nai matua e vaivai o latou finagalo, ia e taitaisese i le tulaga o nisi e oo mai ma faapena. Ae aoga, o le mea sili lea ua saunoa atu le Palemia, ia taoto mai lou finagalo e pei ona e laga, aua le tulaga lea e pei ona e saunoa i ai i le totogi o loia.

Ua maea lou taimi faaii mai lau saunoaga.

Afioga FUIMAONO TEO SAMUELU TEO: Faafetai. E manatu na o si mea laititi lea e faamanatu atu i le, o lea sa tau oo i o i le vaega o Ofisa o Faatoaga, i le Minisita o Faatoaga ona e i ai a tatou \$13 miliona lea e aumai i lalo, ua na o le talosaga i le process foi lea o le tatou **SEFRON**, ina ia faafaigofie. Ne i te i foi ua pe o le **SACEP**. O le **SACEP**, o le maumau ia o lena avanoa lelei. A o le tele ia o le process, e fai fai lava fati nai toeaiina ma nai loomatutua i nuu, na iu lava lea ina toe foi, ae le mafai ona faamalieina le process. Ma le tatalo, e manaia ae faasamoa uma ia forms ia, e o mai nai pulenuu ma nai sui o nuu ma alii ma faipule, e atutovaa atu i le mea lea, ae o la ua faasamoa ia latou le form lea. Ina ia mafai ona faafaigofie lea ona manino le vaega lea faamolemole.

FOFOGA FETALAI: Se i tulai mai le Minisita o Faatoaga.

Tofa Hon Lopao Natanielu Mua (Minisita mo Faatoaga ma Faigafaiva): Faafetai o lea ua faalogo atu foi i le saunoaga a le sui mamalu i le tulaga lea i le lavelave o...O le form lea ua i ai nei ma le pepa lea ua i ai nei ua uma ona faafaigofie mai ia SACEP, ae o lea ua faa-samoa foi. Ua i ai

le faa-peretania ne i te i ua leaga o lea ua uma lou taimi. Ia ae pei o le faamalamalama lena lau Afioga ma le mamalu o le tatou Maota nei.

Afioga FUIMAONO TEO SAMUELU TEO: Ona faaiu atu ai lea o se sao o Falealili. Lau Afioga i le Palemia, faafetai i le taulimaina o le tatou sa, o le upu moni lava, o le taimi lava tatou te manatu mama ai ua leai se faamai ma ua kilia tatou, o le taimi lena e osofaia ai tatou. Aua ne i o tatou manatu mama i le vaega lea. O le tatalo, talatala nisi vaega uma, manaia ia o le mamalu o le Aso Sa. Ia tatou toe foi ina ia fai, ia faamautuina le faamamaluina pea o le Aso Sa i le leai o se mea e toe tatala. Aemaise lava le faleia e masani ai ona alu i ai le ulupoo lea o Aiafi, le sui usufono mo Faleata, ia tapuni na vaega. Ae ou te iloa tapena i le Aso Toonai ia taumafataga o le Aso Sa, ae faamamalu le Aso Sapati, o le Tulafono a le Alii. Faafetai i le faalavelave, o faiga o faalavelave i mea nei talu le lockdown, o se aoaoga mo Samoa, o le a le aoaoga? faafaigofie faalavelave, e le toe i ai ni fesagaiga a paolo. Ae o lea ua faafaigofie, ua ave le faataua i le ua maliu.

FOFOGA FETALAI: Ua maea lou taimi. Na ona faamanatu atu, o la e galo i sui mamalu e i ai avanoa. E 2 avanoa i mea taitasi tai 15 minute, a le usitai la le sui usufono i le Fofoga Fetalai, ua leai foi la sou avanoa i le 15 minute o mulimuli mai i mea taitasi.

Tulai mai le sui usufono ona o lea sa taua lou suafa.

Tofa Lealailepule Rimoni Aiafi: Ioe, lau Afioga. Ia manatua e tele ulupoo ae le lau ulupoo. E eseese ulupoo, o lea ua saunoa i ai le sui usufono. E ese lava a ma tala na fai, ese le mea lea ua sau faasusususu ai vaeane lau Afioga. Sa ou fai i ai e tatalo i le Palemia ma le Malo e tatala mea. E oo i le Aso Sa, alu e faatau lau ia e sau e alu i le lotu e vivii i le Atua, e leai se mea e faaletonu. Ae ua ese le mea lea ua tau ai fua au, ma le faaaloalo lava.

FOFOGA FETALAI: Ua maea le taimi o le sui usufono.

Afioga FUIMAONO TEO SAMUELU TEO: E pei ona silafia lelei e le sui usufono e le mafai ona ou alu ese, o aoaoga lava o lo o tumau ai, o le faifeau. O le faifeau o le tatou Vaega Faaupufai e le mafai ona mei ese mai le Faavae ma le Tulafono a le Tusi Paia. Manuia lau Afioga i le Fofoga Fetalai, manuia le Taitai o le Malo ma le Maota. Oo atu se faamatalaga i le Minisita o Galuega, ou te alu atu i lou ofisa, o le a le faaleoina ona ua maea lou taimi. Ae faafetai tele. Faafetai mo galuega lelei ia outou afioga. A lea lava ua fiafia Samoa, e le tau tolaulau atua o outou suafa, ne i te i ua le maua e tatou se manuia, pe faaviivii atu. Ae o la outou tiute, tatalo i le Atua ia faamanuia ia outou faiva. Foi le sa o Falealili, manuia le tatou Fonousu i lenei taeao faafetai.

FOFOGA FETALAI: Malo faafetai, faafetai i le saunoaga. Ua avanoa foi le Palemene mo se isi saunoaga e sosoo ai. Ua tulai mai le sui usufono mo Faasaleleaga Nu 2.

Tofa NAMULAUULU SAMI LEOTA (Faasaleleaga Nu.2): Faafetai tele i lau Afioga i le Fofoga Fetalai, i le avanoa o lenei itumalo e fai ai foi so matou sao i le Tala Faatatau o le Tupe 2020/2021. Lau Afioga i le Fofoga Fetalai, e faasifo lava le tauvaa ma lelepa ma le gatete. Aua foi o upu a le atunuu e le sili moa i matagi. Ua maea foi ona e fili le niu sa ma faalanu le tapui aua le viiga o le Atua i le taeao. O le mea sili lea i le faamoemoe. O upu masani e a tatou e fuafua, ae a leai le alofa tunoa o le Atua, talofa e, e fai vavale lava o tatou faiva. Faamalo faafetai i lau afioga. Faatalofa atu i lau Afioga i le Taitai o le Maota lau Afioga i le Palemia, Afioga i le sui Palemia ma le vasega o le Kapeneta. Afifio foi le vasega o Minisita lagolago, faatalofa atu i Taitaifono ma sui Taitaifono aemaise le mamalu o pou fa'ifa'ia o le Palemene o Samoa ua tatou potopoto i Tiafau nei, Fonousu a Samoa. Faatalofa atu foi i le faafofoga tapuai mai a Samoa i ona itu e fia, mai mauga maualuluga seia paia mauga iti. E faapitoaugafa sau faatalofa i afaigaluega tofofi a le Atua, o lo o tatalo i le ao ma le po aua se manuia o Samoa aemaise lana Palemene. E le faagaloina foi le tatou auai faatasi ma le afaigaluega tofofi a le Malo, o vae ma lima i ai le Palemene o Samoa aua ana galuega.

Ou te manatu lava o paia o Tiafau, o lea ua soopapa le lafialuga ma le lafialalo, e pei o faiva alofilima o le au-faioa. O lea foi ua maea ona afea fetalai le lauga mua a Lufilufi i lenei taeao, ua maea foi ona paepaeulufanua i saunoaga a sui mamalu a sui o le Palemene. Ona manatu lea, tatou ia faatasi i lena. Ou te manatu, aua e le toe popo pe toe lanu i se faamatalaga. O Samoa foi ua maea ona tuulaupua ana upu, e leai la se vave po o se poto e toe fia auaugalu i ai pe toe fia leolagona i ai. Taalolo laia.

Ae mapu maia i fala faasau lau tapuaiga Samoa, mau i lima faasolo pona o lau afafaalogo, se leaga e fai mai o le afa e matemate ai Malo, ae a? ae fafasi ai le fili. Le mamalu o le tatou itumalo i ona paia faalupe, ee maia i le tapu ae mapu i le sasaga se i lafoaufala se sao aua le taulafoga a Samoa o lo o fai nei.

Lau Afioga i le Fofoga Fetalai, sa i ai le manatu e faapea e muliai se faamatalaga ona o au o lo o i ai i totonu o sui o le Komiti o Tupe, ae ua maua lenei avanoa, ia faatea atu ai loa, aua e puupuu lava se faamatalaga a lo matou itumalo. Sau se taimi ona folasia lea e le Afioga i le matou Taitaifono le lipoti ua maea ona auiliili o le Tala o le tupe Samoa, ua lumamea o le tatou Maota fono.

Lau Afioga i le Minisita o tupe, sa taumate lava i le ete pe tua i ni a le tatou faasoa. Ona o le tele o luitau sa faapea ona feagai ma lo tatou atunuu. E le

gata i le misela, faasolo mai lava lea i le tatou Koviti. Sa i ai se lagona popole sa i ai, matau atu foi, o le faatolu ai lea ona tatou fono i lenei tausaga, e talanoaina, lauliliu le Tala o le tupe a Samoa. O lea sa faamuamua mai le tatou tupe lea na aloaia faapitoa po o le stimulus package muamua, lea ua i ai le lona 2 i le aso. Aemaise foi o le vaega autu o le tupe. Sa ou faalogologo ma le totoa, se ua fia faalogo lava mai le mauga matautia lau folasaga, i le aso sa e auiliiliina ai Tala o le tupe a Samoa. E masalo o se manatu foi lea e fausia ai se lagona o lenei itumalo. O lea sa e saunoa manino, e leai se mea e faapopoleina ai le atunuu i le taimi lenei. o lea lava o lo o lava le faasoa o lo o i ai. O lea foi o lo o tele faamatalaga e pei foi ona laga e nisi o finagalo i lenei taeao tulaga o aitalafu o Samoa o i ai. O lea ua maea ona afea i se saunoaga a le Afioga i le Palemia, aemaise foi o nisi o sui usufono o le Maota.

O le vaega taua lava lea e taua i lou nei sui usufono, le vaega o lau saunoaga lea na e faapea mai ai, a faapasene tupe totogi aitalafu ma a tatou tupe maua. E na o le 11% lea o lo o agai atu ia tatou aitalafu. O lona uiga o le 89% lea o lo o faaagaga mo le faatinoina o galuega a si o tatou atunuu. Ua lava lava lena e faapea atu ai lo matou itumalo, e lagolagoina malosi le tatou Tala o le tupe i lenei tala faale-tausaga. Faamalo le lototele, faamalo le lufilufi lima lelei.

Faasolo atu lau faamatalaga i Afioga i Minisita, ua maea ona folasia le tulaga o i ai le tatou intaneti o lo o i ai. E momoli le faafetai i lau Afioga Afamasaga, lau Afioga i le Minisita o Fesootaiga. Ioe, ua tele ina manino le tatou digital TV, ae o le vaiaso na tea atu nei sa matou agai atu ai i Savaii. Ne i te i ua faapea nai toelaiina sa o matou talatalanoa, o lou faifeau leaga. Sa ou fesili i nai isi toelaiina, sa outou maua le saunoaga a le Afioga i le faamasinoga sili lea sa auina atu i le TV. O le tala a nai isi toelaiina lea i le itu lea i Alataua ma Vaisigano, o lea lava e le i manino atu le TV, atonu e sau se taimi ona talanoa atu ai lea o sui usufono o ia itumalo. A o faafofoga mai toelaiina ia sa matou feiloai i le Komiti i le vaiaso na tea atu nei. O lea ua faatino lau feau sa fai atu, ou te momolia i luma o le Afioga i le Minisita pe a fono le Palemene a Samoa. Malo faafetai.

Lau Afioga i le Minisita o faamasinoga, o le Minisita foi o faigapalota. E muamua lava a o le i see se faamatalaga i le mataupu. E muamua ona faaleo le faamalo ma le faafetai, i lau Afioga i le Faamasino Sili ua tulai mai nei i tofiga ua tofia ai oe e te galue ai i si o tatou atunuu. O le mea moni, e le faigofie ou faiva, ae sagai ane ai o le tai, alo i ou faiva manaia o ou mama na. Lau Afioga i le Minisita o faigapalota, faafetai mo le Tala o le tupe ua faataatia mai, e tasi lava le manaoga o lenei itumalo. O lea e matau atu o lea ua faatino le tatou Ofisa o Palota i Mulinuu nei. O fuafuaga alualu mamao o lea foi ua faafofoga mai le Malo pe sau se taimi, vaavaai i se Ofisa o Palota i Savaii pe a talafeagai. A faapea foi e tusa ma lau faasoa, taatia atu i ina le talosaga lenei, a oo i le taimi o faigapalota pe maua se avanoa, e faapea ai

ona malaga fua le aupalota i Savaii i le aso lava lea, e o e faatino le palota ma toe o mai. Masalo o le talosaga lea e au atu foi i le Minisita o Galuega, lau Afioga i le Minisita o Kamupani vaa, pe a talafeagai fuafuaga a lo tatou Malo.

Lau Afioga i le Minisita o Aoga, e momoli atu le faafetai, se pau lea o le Minisita ta te vili atu i taimi uma e mata ataata mai ma talitali mai ia ta fesili. E pau foi lea o le Minisita a missed call le telefoni e toe valaau mai lava. O le uiga o lea faamatalaga, faafetai i le fesoasoani ma le lagolago ua tuuina mai, o lea o le a faatinoina le faleaoga o si ou itumalo i le tausaga lenei, po o le masina foi lea o le a gafua nei. Faafetai i le Malo o Iapani mo lea fesoasoani, ou te manatu e leai se itumalo o ave le talosaga ia Iapani, ua tele foi le fesoasoni mai i lenei Malo. Malo faafetai i le Malo o Iapani, momoli atu le faamalo i lau Afioga i le Minisita.

Lau Afioga i le Minisita o Faatoaga, o lea ua maea ona faaleo atu e Falealili se tasi o vaega sa ou fia talosaga atu ai. Masalo e maea loa le tatou faalauiloa lea o le a fai i Savaii i Safrona po o Sarena, sa ou talosaga i lau Afioga pe maua se avanoa e o atu ai ni sui o le matou Matagaluega, o lea e luelue mai le ulu o Aliimalemanu, i si matou itumalo, e fia malamalama foi i le tulaga lea, po o le a le agavaa e talafeagai, e faapena ona talosaga atu ai, i le tulaga ua i ai faamanuiaga ia i le project lea ua faatino nei. Faamalo faafetai, o le manaia o le poloketi lea e faatino nei, e le gata e agai atu i faatoaga, ae agai atu foi i le au faifaiva ma isi vaega o le atinae o le tatou atunuu. O le mea moni lava, i le taimi lea sa oso ai le Koviti, e tele le taua, ua tutupu ai ni mea lelei. O a mea lelei? A lea ua matauina ua tele ina agai le mamalu o le atunuu, agai atu i le gataifale i le sami. Ae le gata i lea ua amata foi ona naunau e faatino atinae i uta i faatoaga. E tatalo i lau Afioga, o le ki lea ma le tatalo o le tatou economy. E taua tele, ioe, a i ai lava ni polokalame, uunai atu ia matou i tua matou te faatino mai, aemaise lava le tulaga lea, o lea foi e i ai lipoti ia sa matauina ma faitau ai. O le koko ma le popo a Samoa...best in the world. O le matua manaia lava. Ia e manaia foi pe avane nisi polokalame e ono faamalosi ai le vaega lea. Uunai atu i tua i Sui o Nuu, e faapena ona faaogaina ai laufanua o lo o i ai i si o matou itumalo. O le niu ma le popo ma isi vaega faapena. Ae faafetai mo mea uma.

O le vaega lea i le tau o le tatou talo, ia e faaleo atu pea finagalo o sui o lo matou itumalo, ia ua tau fati lava ia le tulaga lea o le toto o talo. Aisea? Aua foi e i ai le taimi ua sau ua \$70, \$60, ae a tele loa foi, ua sau loa i lalo ia le tau sau \$40. Ae a siaki atu i Niu Sila, o le tau lava e tasi. Se i tagatagai i ai lau Afioga i le tulaga lea, pe le mafai ona fesoasoani foi i tatou exporters, ou te iloa a faapea e le pasi mai i lalo o le \$50, o na e make lava ia le faifaatoaga. Ae o le taimi lea e sau ai i lalo o le \$30 ma le \$40, ia ua faapena foi ona discourage ai i latou e toto le talo.

Tofa Hon Lopaoo Natanielu Mua: Lau Afioga i le Fofoga Fetalai...

FOFOGA FETALAI: Se i tulai mai le Minisita o Faatoaga.

Tofa Hon Lopao Natanielu Mua: Faafetai mo le mataupu aua o le mea muamua i le koko ma le niu lea o le polokalame lea e alu atu nei a le SAFPROM po o le SAFPROM. O le tele o le tupe lena e fesoasoani i le koko ma le niu, ae e pau lava le mea e pei ona matauina foi i le itumalo o le sui usufono o lo o saunoa nei, e malosi tele le manu ainiu ae leai se mea o faia i ai. Ae pe mafai ona fesoasoani ifo ia lo outou afioaga e tagatagai i le manu ainiu a o le i oo ona avatu fesoasoani. E tatau foi ona fai se galuega a le nuu, ma le itumalo e uiga i le manu ainiu. Na matou asia foi ma faatonu ia pulenuu o afioaga ia.

Ae o le tulaga e pei ona i ai ia le tau o le talo, ia o uiga ia o le maketi o lo o tuuina atu lava i ai latou o lo o faapea ona aveina auina le tatou talo i fafo. Ou te oo mai i le Matagaluega sa i ai le faatulafonoina o le tau mauualalo sa i ai e \$38 i le 22 kilo e le Afioga i le sui sa seei i le nofoa i lou vaitaimi ona ou tatalaina lea i luga e pule ia latou ia e avea, let the market decide the commodity price o le talo. Ia o lena la sa oo ai i luga lea na oo ai i luga i le \$75 ona ua tatala i luga talu ai ona ua oo le Matagaluega faatulafonoina le pito i lalo, ia ua omai uma lava alu uma i lalo o le tele lava i le \$38, \$40 \$45. Ia ae peitai ane, o le tulaga lena sa mafaufau ai i ai ae ona o le tulaga foi o le maketi e i ai i Niu Sila ma atunuu mamao.

O lo o aumai foi ia matou ripoti i le tatou Ofisa o le Konesula i Niu Sila e latou te lipoti mai ai i le Matagaluega ma au nei ia le fesuisuiaiga o le tau o le talo i Niu Sila. Ia ae ou te lagona, o lo o ogatasi ia fuafuaga ma fesuisuiaiga o le tau ma le tau o le talo i Niu Sila i le taimi sa oo ai i le \$10 i le kilo. Ia na oo foi ia le tatou talo i le \$75. O le masina lea na tea atu nei na toe tau amata nei ia Me ma Iuni, ia ua toe tauamatamata i le \$55 o isi la e \$60. Ia ae o le a faapena ona feutagai pea ma i latou e feaveaia ma avatuina ia le tatou talo i Niu Sila mo tulaga e pei ona saunoa i ai lau Afioga ma le faaaloalo faapena foi ma lo tatou Palemene.

FOFOGA FETALAI: Ia malo.

Susuga Hon Laauli Polataivao Leuatea: Lau Afioga i le Fofoga Fetalai si mea laitiiti lava e fia faamalamalama i le saunoaga a le sui usufono mamalu.

FOFOGA FETALAI: Ia se i tulai mai ia le sui usufono o Gagaifomauga Nu.3.

Susuga Hon Laauli Polataivao Leuatea: Faafetai o lea ua afea ia le tulaga lea o le tau o talo. Ae ua ou tulai atu lava ona o lea e atugalule sui

usufono i le tau maualalo, tau maualalo lea e faitio ai ia nai faifaatoaga, e fiu e toto talo ae faapenei le alu o le maketi.

O le mea la lea na saunoa ai le Minisita o au lea na sekia ia le tau maualalo ia e faamalulu atu. Sa ou taumafai e regulate le tau, ina ia fealuai faapea i le taimi o le maketi i lona tulaga e le i tamau se tau. Leaga o la e faalogologo mai ia le aufaifaatoaga, o au na ou sekia le \$38. Leai lau Afioga, o le agaga e fua le tau i le tulaga o le fegauiaiga o le maketi, mai lea masina sa fesoasoani mai ai lo tatou Ofisa tutotonu, o le Konesula a Samoa. Pei o le agaga lena e faamalamalama ne i te i ua tuuaiina mai faapea o au na sekia leai, e fetuunai le tau o talo mai i lea taimi i lea taimi. O le agaga lena ma le faaaloalo. Na ala foi na fai le tulaga o le faamaopoopoga, ina ia aua ne i i ai se faipisinisi e taaalo i le aufaifaatoaga ia ma lou agaga faaaloalo.

Tofa Hon Lopaoo Natanielu Mua: Faafetai o lea

FOFOGA FETALAI: Ia se i tulai pea le Minisita.

Tofa Hon Lopaoo Natanielu Mua: Leai e pei ona ou fai atu, o le tulaga lena sa ou maua mai e \$38 le tau maualalo sa i ai. Ia o lea na fai ia le matou feutagaiga ma matou fuafuaga ma le Matagaluega, o le a tuu i luga e open le maketi. E pule le maketi e decide ina le price. Ae e mataulia foi mea nei, o le supply ma le manaomia, supply and demand, e latou te dictate ina le price i le mea lea e i ai nei. Ia o le mea la lena ua alualu ai nei ae i ai isi taimi ua pau laititi i lalo ae e i ai le manatu foi lea e matou te le, e faigata ia i matou ona matou toe fetagofi i le tulaga lea o le set o le price e pei o le mea lea sa i ai. Ia ae sa faapena le fesuisui ai o le tau e fuafua i le tau la e faatau ai le talo leaga e le na o tatou o Fiti ma isi atunuu la e avatu ai le talo. Ia ae pei foi e fiafia tagata i le tatou talo niue lea ia Fiti, ae e pei o le agaga lena.

Ae o le taimi nei ua maua mai foi lipoti i le tatou Ofisa ua matua alumia lava ia le tatou talo, ua lelei foi ia le tauvaga i le va o le talo Samoa lea e i ai nei ia ma le talo Niue lea ia Fiti. Ae e ui i lea, ia faamoemoe i le Atua e fesoasoani mai i taumafaiga a le Matagaluega faapea foi le aufaifaatoaga ma i latou o lo o avea, tatou talo i fafo.

FOFOGA FETALAI: Ia malo, ia se i tulai mai le sui usufono o Faasaleleaga.

Tofa NAMULAUULU SAMI LEOTA: Faafetai lava i lau Afioga i le Fofoga Fetalai faapea foi le Minisita mo le faamalamalama o lea ua manino le tulaga lea. Ae e tasi lava ia le vaega lea ou te fia pai i ai i le vaega lea tau talo, faafetai sa ou valaauina ia le Afioga i le Minisita o Tupe, ma te tietie i tua sa tau tapena le suavai se i tausami ai i le talo mai Fiaga. Ioe o le auala lea i uta ia matou, o le matua fesoasoani lau Afioga o lea foi e

faafogafoga mai ia le Minisita o Samoa Land, lau Afioga Lautafi. Manaia le faatinoina o le auala lea sa i ai talu ai nei e agai atu i uta i o, ia ae ua toe faaleagaina uma lava e timuga ia na tea atu nei. Ae o le mea moni ou te le tau fola atu, o uta i o i Fiaga lea e tele le supply o le tatou talo lea o lo o sau ai. Ia na ona taatia atu, pe a maua se avanoa e tagai i ai lau Afioga aemaise le vasega o le Kapeneta e tau fesoasoani atu i le auala la e i uta i Fiaga.

Lau Afioga i le Minsita o Tupe Maua, momoli atu le faamalo i lau Afioga. E matau atu i Tala o le Tupe i tausaga ua mavae, o lea lava e tele lava ina sili atu ia Tupe Maua i Tupe e faapea ona Faatatau. O nisi tausaga lea e \$7 miliona. O le isi tausaga e \$21 miliona. O le isi tausaga e \$6 miliona. O lona uiga, faafetai tele mo le galuega faatino.

Faafetai i le tulaga lea o le Tax Monitoring System lea ua maea foi ona talanoa mai ai le sui usufono o Falealili. Ioe o le tasi lea mataupu ua leva ona lauvivilu i ai ia le Private Sector, ma le aufaipisinisi, i le tulaga lea i le, the level playing field of paying tax. Ae faafetai ua tafa le finagalo o lau afioga, aemaise foi o le Matagaluega e faatino le system lea ina ia faapena ona ogatasi ai ma fuagatasi ai i latou. Aua e i ai le isi taimi e te alu atu ai i le faleoloa, ia o le Prado lava e tasi, ae e fai si eseese ona e maua atu foi, o le tulaga lea e faafetai ai o lona ua i ai le system lea e atili ona monitor ai ia tatou aemaise lava i tai i le border. Ioe i le ofi mai o oloa i totonu. Ou te iloa foi e i ai le talitonuga o lou nei sui usufono, a lelei lava ona monitor ia le tatou system lea, ou te iloa ua atili atu ai foi ona faateleina atu tatou tupe maua a lo tatou Malo o le a i ai nei. Ae faaleo atu le faafetai a lenei itumalo, o lea lava e matauina, le alualu i luma o a tatou tupe maua, i galuega a lau Afioga ma le Matagaluega.

Faafetai i le Ofisa o Leoleo, tasi lenei Ofisa e matauina e ese ma le galulue malosi. Faafetai i le Afioga i le Komesina ma le Matagaluega. O lea foi ua tuu atu le faatuatuaga a le Malo i le falepuipui. O le mea moni, i le taimi foi o faagasolo talanoaga o le Tulafono lea i tua e maua ai foi se manatu. Ioe aua ua amata lava ona sosolo atu i tua le tulaga lea i le malosi o le atinae o marjuana aemaise foi le tulaga lea o le aisa. O lea ua amata ona sasao faaafi i totonu o le taulaga, ia e momoli atu le faafetai.

Pau lava le tuualalo a lenei sui usufono, lau Afioga i le Minisita ma le Afioga i le Komesina, faaauau galuega lelei o lo o fai. E tatou te le manaomia le mea lena i totonu o lo tatou atunuu. Ioe o le mea foi lea e matau e lou nei sui usufono, o le mea foi lena e taua ai Pulega a Alii ma Faipule i totonu o nuu, e tau taotaomia ai le mea lea. E faapena foi ona maua ai le filemu i totonu o nuu ma alalafaga. E momoli atu ai le faamalo i le Afioga i le Komesina e ala atu i lau Afioga, e faaauau galuega lelei o lo o faatino nei, ia taotaomia lava i lalo vaega ia. Ioe ma le faaaloalo.

Lau Afioga i le Minisita o Galuega, e fia faaleo sau faafetai i le service a lo tatou Kamupani Vaa. O sui nei e agai lava i Savaii i le tele o vaiaso uma. Amata mai lava i le taimi o le misela sau i le Koviti, faafetai mo galuega

faatino. O lo o faatinoina pea aua le mamalu o le atunuu agai atu i Savaii. Ioe, e faaleo atu ai foi se faafetai e auala atu i lau Afioga, i le Afioga i le Ofisa Sili ua tuanai atu nei, Papalii Nansen. Ia ae faafeiloai atu ai foi i le Ofisa Sili fou ua tulai mai, manuia lou tulai mai i faiva.

FOFOGA FETALAI: Toe lua minute o le sui usufono.

Tofa NAMULAUULU SAMI LEOTA: Ia ua maea foi mataupu lau Afioga.

FOFOGA FETALAI: Faafetai, faafetai lava.

Tofa NAMULAUULU SAMI LEOTA: O le vaega mulimuli, e na o le talosaga i lau Afioga i le Saofaapito lau Afioga i le Minisita, manaia ia o tatou moli ia sa faapena ona talosaga mai ai le matou aulotu e tasi, maua atu ai moli. O le talosaga ia a faapea o ai le kamupani sa aumai ai? Ia, o lo o talosaga e tele talosaga a lou itumalo i moli ia e ese le aulelei o solar lights ia, e faapena ona fesoasoani e le gata i Ekalesia ia a o aoga. Ia o lo o i ai foi ia ni talosaga na tuuina atu, pe tou te tagatagai i ai, pe le maua nisi avanoa e maua ai nisi moli, e fesoasoani i talosaga o lo o tuuina mai. O le faafetai mulimuli...

Afioga Hon Papaliitele Niko Lee Hang: Lau Afioga i le Fofoga Fetalai...

FOFOGA FETALAI: Ia se i tulai mai ia le Minisita o Galuega.

Afioga Hon Papaliitele Niko Lee Hang: E matau atu ua lamalama faaiu le saunoaga matagofie a le sui usufono mamalu. E na o le tuualalo lea na talosaga mai i mea o pasese i luga o vaa i le aufaipalota. O lea ou te fia manino, pe na o le Matagaluega o le Ofisa o Palota? Po o tatalo mai foi i le mamalu o le atunuu, e o fua i le vaa i le aso o le palota. O lea la ou tali atu ae e le i oo i o. O le mamalu o le atunuu, e le mafai. Mo le au Ofisa o le au Palota, o la ua i ai ia le latou budget i femalagaiga ia. E le tatau foi la foi ona talia, ae na o se tali puupuu atu lena se i aumai pea lau talosaga i le Pulega pe talia le o o le aufaigaluega, e o fua i luga o le vaa. O la foi e fiaola le kamupani vaa ia, faafetai.

Tofa NAMULAUULU SAMI LEOTA: Ioe, o se matou tautauilemau lena mo le mamalu o le aufaipalota lea e malaga atu i Savaii ina ia manino le aupalota lau Afioga i le Minisita. Ae taatia atu i ou tafatafa.

Ia o lau faafetai mulimuli, faafetai i lau Afioga i le Taitai o le atunuu, le Afioga i le Palemia. Malo le faatoatoa malo le lototele. Ioe, talofa e, ua tele lava ina satia oe ona o lou valaauina. Satia si ou aiga ona o lou valaauina, ia

malo le lototele malo le toa. O le tatalo a le itumalo, maua pea lou malosi e faatino ai tiute ua foai e le Atua e te galue ai. Faapea foi i le vasega o Minisita o le Kapeneta, manuia ia outou faiva o lenei tausaga.

Lau Afioga i le Fofoga Fetalai, ia na ona ou fia pai lava i si ou itumalo, e momoli atu le faafetai i si ou nuu o Sapapalii ma si ou nuu o Safotulafai. Le Susu aua Samalietoa ma le alalafaga o Usoalii. Le Paia ia Mago ma Luasiufanua le nofoituaiga ma le mamalu ia te oe Sapapalii. Si ou nuu ia Safotulafai, aua le Afio o Leilua ma le Toalima o Alii. Saalalatoa ma alo o Malietoa, ia ma le Matua. Alalatai laua na pule, Tuilagi ma Namulauulu. Uma loa le Pule a le Atua sosoo loa ma le Pule a Tuilagi ma Namulauulu. Ioe Maopu Tufuga ma le na aimalae, lauti na laulelei, le Vainalepa ma le mamalu ia te oe Safotulafai. Se e ta te lilia lava i le tai sua, ae lagona lota mafanafana, i lau tapuaiga leleoa. E ta te atupopole foi i le vaosa, ia ae ta te mafatotoga, i le mana o a outou talosaga. Se ua faamalo faafetai i si ou itumalo.

Lau Afioga i le Fofoga Fetalai, o le tatalo lena, tau ina ia saga faamanuia le Atua i lau Afioga aua lou afio ai ma lou seei ai i le nofoa faatonutonu folau a le Palemene o Samoa. O sa matou tala lea, o se matou sao foi lea, faamagalo se matou upu ua lagavale pe ua le taulaulu i la outou fita faafofoga. O upu lava a le aufaitofa a le atunuu, ia, e leai se faiva e leai se lafoai, e poto lava foi le tautai ae i ai lava le taimi e se ai le atu i ama. Ou te manatu, faamagalo ni lape, faatafea ni ilimamate, ia ae a? Tatou seu i le Atua lea na tatou tapa i ai i le taeao e magalo ai tatou mea uma. E faatai ma se leo o le auauna, ia faamatafi e le Atua lo tatou aso, soifua ma ia manuia. Faafetai.

FOFOGA FETALAI: Malo faafetai. Ia, manaia le saunoaga a le sui usufono pei ona saunoa nei. Ae tatou te le i oo atu i le saunoaga a se isi sui usufono e fia saunoa, ou te tapa le Afioga i le Palemia mo se lafo e taitai ai taulalumaga o le tatou galuega ma polokalame o le tatou Fono.

LAFO MO LE SUIA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, faapea foi le mamalu i sui usufono o le tatou Maota nei, ou te tulai atu e faatu le lafo, *Mo le suia o tatou Itula Fono mai le 1:00 i le aoauli nei, ona toe tauaofia lea i le itula e 6:00 i le afiafi a nanei i le 11:00 i le po. O le a i ai se isi fetuunaiga pe a pasia le tatou Tala Autu ma le Tala Faaopoopo o Tupe.*

O le lafo lea ma le faaaloalo tele i le Maota.

Faaluaina e le Sui Palemia ma le Aiga Kapeneta.

Na faamaonia le lafo.

FOFOGA FETALAI: Ia, o le a faapena ona faagasolo galuega a le tatou Fono Aoa. Ia ua avanoa foi se isi sui usufono e tulai mai e faaauau le saunoaga e le i taitai le tatou taimi.

Ia tulai mai, aua o le manaia o taimi faapenei e faaiu ai ae toe tamua foi pe a toe tauaofia le Fonotaga i le itula o le taimi o le afiafi.

Ia, e manaia foi le lafo mai i lea itu o le Maota. Ia manatua foi leaga o le itu o le Maota o Minisita Lagolago, o le latou Tala faatasi lea o le Tupe? Ae pei na maua le avanoa o Lufilufi leaga o ia lea o le uipi a le Vaega Faaupufai. Ae a maea lava le itu lea ona saunoa, ia o le a uma foi o le a tali le Malo.

Afioga Fuimaono Teo Samuelu Teo: Lau Afioga i le Fofoga Fetalai, e tau tomanatu pe ono faatu se lafo e tali ai le Malo lau Afioga.

Tofa Olo Fiti Afoa Vaai: E faaluaina le lafo.

FOFOGA FETALAI: Ia, ua i ai le manatu ona o lea ua faatu mai le lafo, ma ua faaluaina. Ae i ai le manatu leaga e le i saunoa Taitaifono o le Komiti o Tupe. Se ua outou laki lava ona o le le i saunoa, ioe. Se tulai maia sui usufono e saunoa. Ia, tulai maia le sui usufono mo Salega Sisifo. Saunoa ia lau Afioga Toomata.

Afioga TOOMATA AKI TUIPEA (Salega Sisifo): Ia, sa faatalitali lava se i tulai uma sui usufono o le Maota talu ai o le Lipoti o Tupe lea o lo o i lumafono i lenei aso. Ae ua ou manatu, e sili ia ona ou amata atu i ni tuualalo a lenei itumalo.

E muamua ona ou faatalofa atu i lau Afioga i le Fofoga Fetalai aemaise foi tulaga faalupe o le Maota. Afio lau Afioga i le Palemia, lau Afioga i le Sui Palemia aemaise le Aiga Kapeneta. E faatalofa atu i Minisita Lagolago ae faapea foi le mamalu o sui usufono mamalu o itumalo taitasi o le Malo Tutoatasi o Samoa. E le faagaloina foi tupu ma tamalii aemaise o i latou o lo o avea ma Ofisa Sili o Pulega o Matagaluega ma Faalapotopotoga a le Malo, i latou o lo o vae ma lima i le tautuaina o le Palemene o Samoa ma le Malo o Samoa.

Ou te faatalofa atu foi i le faafofoga tapuai a Samoa i ona tulaga faalupe, le paia lava lea i Tama ma Aiga, Aiga ma latou Tama, Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ae o le a taumafai atu se sao puupuu o lenei itumalo i le Tala Faatatau Autu o le Tupe ma le Tala Faatatau Faaopoopo Lona Tolu o le Tupe 2019/2020. E momoli le faamalo ma le faafetai i lau Afioga i le Minisita o Tupe aemaise lava le tapenaga o lenei Tala Faatatau Autu o le Tupe ma le Tala Faatatau

Faaopoopo o le Tupe 2019/2020 i le Matagaluega o Tupe faapea Matagaluega ma Faalapotopotoga uma a le Malo na tofusao i le tapenaina o lenei Tala Faatatau Autu o le Tupe 2020/2021.

I le matau atu a lou sui usufono i le faatulagaina mai o fuainumera, e matua lagolagoina e lenei itumalo le Tala Faatatau Autu o le Tupe 2020/2021 faapea le Tala Faatatau Faaopoopo o le Tupe 2019/2020. E matua talitonu i le tapenaina o nei fuainumera e le i faataga faia, aemaise o le taimi muamua lenei ua mafai ona faataatia ai i totonu o le Maota lenei le Tala o Tupe Maua, o Tala o Tupe ua faaoga i le tausaga faaletupe 2018/2019. O i ina o lo o maua ai ni mafauauga ma talitonuga o le tapenaina o lenei Tala Faatatau Autu o le Tupe 2020/2021, o lo o mausali lona faavae. O fuainumera ua tuuina mai atoa ma fuafuaga i le faaaogaina o nei tupe i atinae esese ma le faagaoioiga o le taotu Malo. O lea e faafetai ai i le Ofisa o Tupe ma le Ofisa Suetusi faapea Matagaluega uma a le Malo ona ua matauina i le Lipoti a le Suetusi le sologa lelei o le faagaoioiga uma o Matagaluega i le 2019/2020 ae faapena foi, e oo mai i le taimi o le sailiiliga a le Komiti o Tupe i le tausaga faaletupe 2019/2020 toeitiiti uma, o lo o faapena lava ona gasolo lelei le tulaga o le faaaogaina o tatou tupe aemaise foi ua lava a tatou tupe maua. O lea e vaavaai atu foi i le Tala o le Tupe, e tele a tatou tupe o lo o maua mai fesoasoani mai fafo.

I le tupe maua o lo o i ai nei, e \$249,575,571 tupe ia o lo o maua mai fesoasoani mai fafo. O le fesili, aisea? O le tali a le sui usufono mo Salega, o lo o mafai ona faatuatuaina ma amanaia e Malo mai fafo ma Faalapotopotoga mai fafo taitaiga a le Malo ma le faafoega o le tatou Malo o Samoa. O le mea lea e momoli atu ai le faafetai tele i lau Afioga i le Palemia ma le Sui Palemia aemaise o le vasega i le Kapeneta mo la outou faatofalaiga ma le faafoeina o le tatou Malo.

E le gata foi i lea, ua matauina fuafuaga o tupe mo le faaaogaina e Matagaluega ma Faalapotopotoga a le Malo, o lo o fuafua lava i tupe e tatau ona maua aemaise o atinae o lo o fuafuaina aua lava le faaleleia o le tamaoiga o Samoa aemaise foi le faagaoioiga o Matagaluega ma Faalapotopotoga taitasi. O le a le tele sau faamatalaga i le Tala Faatatau o le Tupe ona e sau se taimi ona saunoa lea o le Taitaifono e auilili vaega uma o lo o sau i totonu o le Tala Faatatau Autu o le Tupe 2020/2021, ma le Tala Faatatau Faaopoopo Lona Tolu o le Tupe 2019/2020.

Ae i le matau a lou sui usufono, e ui lava ina faailoa mai le tulaga e foliga e pau po o le deficit lea e taua soo, ae o lo o matauina le tele o tupe o lo o totoe i le faaaogaina i le faaiuga o lea tausaga ma lea tausaga faaletupe. O lea na o ni foliga ma ni fauuga ma ni taumafaiga e fua i fuafuaga o lo o fuafuaina e le Malo, a o le tulaga moni, e i ai taimi e sau ai a tatou tupe maua ua sili atu i lo tupe ia ua faailoa mai i i le Tala Faatatau o le Tupe. Ae i ai foi taimi e oo ai i le faaiuga o tausaga o lo o tele tupe e le o faaaogaina ona toe faaoga lea i nisi o atinae ma nisi o fuafuaga a le Malo. O le mea lea e le

popole ai lou sui usufono i le tulaga lea o lo o foliga mai e pau, a o le mea moni, e leai se pau. Ou te faapea atu ai, malo le tauatai, malo le tauatai, malo le onosai, malo le tautua Malo, malo le alofa i tagata o le tatou atunuu.

Faafetai mo le stimulus package, o se fesoasoani tele lea mo tagata uma aemaise le aufaipisinisi, aemaise foi le tulaga o lo o i ai lenei faamai, lea ua aafia ai le tatou lalolagi. E ui lava la e le i oo mai i Samoa, ae tatou te tatau lava ona faia uma puipuiga uma ina ia malupuipuia ai lo tatou atunuu mai le ofi mai o lenei faamai oti. Aua o le mea moni, e le lava lo tatou tamaoaiga, e le lava foi le atamai o tatou tagata e mafai ona tetee ma togafitia ai nisi o le a aafia i lenei faamai oti. O lea ia tatou onosai pea, afai foi ua talatala nisi vaega o le lockdown, tatou onosai i nisi vaega o lo o totoe. Ae o le a amata atu nai motugaafa i Matagaluega taitasi, e le o Matagaluega uma.

FOFOGA FETALAI: Ma lou faaaloalo ou te faauilavea i le saunoaga a lau Afioga Toomata ae te le i oo atu i le Tala o le Tupe i le tulaga o Matagaluega taitasi, ou te tapa ma le faaaloalo lau Afioga ona o lea ua tatou toai taunuu i le taimi e malolo ai le tatou galuega nei i le 1:00 ae toe amatalia pe a ta le 6:00 i le afiafi e pei ona faatuina mai e le Palemia le lafo ma ua pasia. O le mea la lea ou te faasilasila atu ai ma le agaga faaaloalo, o le a faataatiaese Galuega a le Fono Aoaofaitulafono i le aoauli nei seia paia le itula e 6:00 i le afiafi.

Na faataatiaese Galuega a le Fono Aoaofaitulafono i le itula e 1:00 i le afiafi seia aulia le itula e 6:00 i le afiafi.